

Usonhi Onete oyi iJesu iKirisiti ni iMaki O keke

*Itsabo oyi iJoni Oni oọ batazi egbọ
(iMat 3.1-12; iLuk 3.1-18; iJon 1.19-28)*

¹ Ona o khi igbaekele oyi usomhi onete oyi iJesu iKirisiti Omi Eshinegba.

² A keke ọli shi Ebe-no-pfuase ni ọmekẹguele ọyọli ni a lu Azaya ọ keke. Ni Eshinegba ọ la liẹ,

“Mhi ya ghie aghiusomhi
oyemhẹ ralo ne.

Oni ọ ya bẹ ode
shi eke khe.”*

³ “Ogbọ ọ la ọdagbe
ẹ pfi okokokhue. Oọ liẹ,

‘A riẹle ode
shi eke khe Onomhue,
ni ọọ bhale.

Riẹle oni ode sheshe
ni ọ rote.”†

⁴ Ighọ IJoni ọ li bhale, oọ batazi egbọ obini ọdagbe ifufu, oọ tse abọ, oọ liẹ, “A mu pfi lase olamhẹ eyẹ ẹ le bhale deba Eshinegba ini a ri olamhẹ topfa ẹ.”

⁵ Ighọ egbọ e rote eke iJudia ali eoli iJerusalemu le deba IJoni. Ee zono olamhẹ eyewe ye ọli. O la oke iJodani batazi egbọ.

* **1:2** Li zẹ iMala 3.1 † **1:3** Li zẹ Aza 40.3

⁶ Ode ni a ri iriria eyi alakumi do, iJoni o ro fia itsua so. O ri ekuẹ rieḷe oḡbẹne mu oku. Initso ali oribo e khi eminale eyoli.‡

⁷ Abọ ni oḡ tse gueye agbo khi: “Omose ni o ke ya bhale eḷeḷese ode ukhokho oyemhe, o fu doḷe mhe, o mholi ekpabo doḷe mhe. Mhi aa fu ramhi oni oḡ taghiẹ uli ni o la ekuẹ ni o so-a.

⁸ Amẹ mhi ro batazi e memena, ama Ayemhe-no-pfuase o ke ro ya batazi e.”

Ibatazi ali imufe oyi iJesu

(iMat 3.13--4.11; iLuk 3.21-22; 4.1-13)

⁹ Oa te agho teḷe ne, ni iJesu o ro roḷe iNazareti ni o la eke iGalili bhale ni iJoni o la oke iJodani batazi oḷi.

¹⁰ Abi iJesu o ro leḷe roḷe elemhi oke ji egbe ngale te, o me khi idane o khueghie. Ayemhe oyi Eshineḡba o li abi anekhukhu roḷe idane tiemhile ya ma li egbe.

¹¹ A suo khi uruli o roḷe idane ngme tiemhile, oḡ, “Omimhe ni mhi nono ingme oyoli u khi. U ma ri egbe e mu mhe gba.”§

¹² Utoghuokpe, Ayemhe oyi Eshineḡba o rue iJesu je odagbe.

¹³ Oḡbeḷe egbhuẹva o la oobọ. Okphaghiẹ, ni o khi oghie ayemhe ebe, o mu oḷi fe. IJesu o nu elamhako la oobọ, ama iḡeni eyi Eshineḡba e ri ukpeloe e khu oḷi.

Eniye odukhokho eni odode ni iJesu o ze

(iMat 4.12-22; iLuk 4.14-15; 5.1-11)

‡ 1:6 Li ze 2 Ighie 1.8 § 1:11 Li ze Igbae 22.2; Iwolo 2.7; Aza 42.1; iMat 3.17; 12.18; iMak 9.7; iLuk 3.22

14 Abi a rọ mu iJoni shi owa ighumha se, iJesu ọ je iGalili ya tse abọ usomhi onete oyi Eshinegba.

15 Oọ liẹ, “Oni eghẹghẹ o she bhale, Eghiele oyi Eshinegba o she ti mama awa. A mu pfi lase olamhẹ eye ẹ le, ni a mie oni usomhi onete suọ.”*

16 Abi iJesu ọ rọte epfepfe okẹ oniẹmhi oni o khi shi, na lui iGalili kia lẹ, ọ mẹ iSamọ ali inyoghuo ọli Aduru. Egbifele e khi. E pfi aga lo elemhi oni okẹ, ee gbe ifele.

17 IJesu ọọ wẹ, “A deba mhẹ, mhi ya sẹsẹ e abi a ke liẹ ke ti egbo gbili.”

18 Aghoaghọ e ku iga eyewẹ shi ekẹ, ẹ deba li.

19 Ọ ke te aghọ je odalo dẹnẹ, ọ gbo mẹ inyoghuo etuava, iJemhisi ali iJoni imi iZebedi e la elemhi oko-okẹ oniẹmhi, e zu iga eyewẹ.

20 Abi iJesu ọ rọ lẹsẹ mẹ wẹ, o lu wẹ e deba luẹ, aghoaghọ e pfi itawẹ ali egbo ni e nu wẹ ye shi elemhi oko-okẹ oniẹmhi, e deba li vu.

*Ijesu ọ khu omose ayemhẹ ebe egbe-a
(iLuk 4.31-37)*

21 Ijesu ali eniyẹ odukhokho eyọli e bhale ẹoli iKapanomu. Ogbẹle iyemhẹa ni o ke deba li, iJesu ọ dọsẹ lo elemhi owa ugamhi, ọ la aghọ sẹsẹ.

22 O ri abọ sha egbo ni e ri esọ kpe abi ọ li sẹsẹ, itobọ khi eri ọ sẹsẹ egbo abi ogbo ni ọ lẹsẹ emini ọọ sẹsẹ, osẹsẹ oyọli o kiọda shi oyi eni e sẹsẹ Ishi eyi iMosisi.†

23 Utoghuo kpe omose ni ayemhẹ ebe o la egbe, ọ lo elemhi oni owa ugamhi le. Ọ tsẹsẹ gbaa! Oọ,

* 1:15 Li zẹ iMat 3.2 † 1:22 Li zẹ iMat 7.28-29

24 “Elo wa nono anye egbe, iJesu na iNazareti? Eri u bhale ya pfuse anye-a? Mhi ga leşe oni u khi. Oni O pfuase oyi Eshinegba u khi.”

25 IJesu o dese oni ayemhe obe, oo li, “Guese unu pia, te oli egbe lase le.”

26 Oni ayemhe obe o nighise oni omose, o mu oli pfi gbe. O pfi okokokhue, o rote oni omose egbe ya lase.

27 O ga ri abo sha egbo nya. E mhila egbe we, “Onoghwo na? Oseşe onogbo ni o mholi ekpabo! Eri o ga nu ayemhe ebe e ngme, e ga suo eso na li.”

28 Aghoaghо ingme oyi iJesu o gbe eke-a asha kpa eke iGalili.

*IJesu o ri ebubu egbo ze
(iMat 8.14-17; iLuk 4.38-41)*

29 IJesu ali eniye odukhokho eyoli, ghe iJemhisi ali iJoni, e ga rote owa ugamhi fişe lasele, e ya je apfe oyi iSamо ali Aduru

30 Ogo iSamо oni okpotso, o yeshi ghua ughuamhi iba. IJesu o leşe ramhi agho, a gue ingme oyoli ye iJesu.

31 Igho o lo deba li, o mu oli obo, o mu oli ukpho vule. Igho eni iba e lase oli egbe le. O fele we epfese.

32 Elogbomhi elegho khi ovo oo tiemhi eko, egbo e tsua eni ea ze, ali eni iyemhe okphaghie e yeshe ngme bhale ghi iJesu.

33 Egbo nya ni e la oni eoli e le gba odalo oni owa.

34 IJesu o ri eni e ghua, ighuamhi khi ighuamhi, ze. O khu ayemhe ebe ebubu egbo egbe a, ama o a ze ni eni ayemhe ebe egho e ngme emhikhoghwo unu lasele, itobo khi e leşe oni o khi.

*Ijesu o la iGalili tse abo usomhi onete
(iLuk 4.42-44)*

³⁵ Ogbie-fiefie ogbeakolo khi obili o a pfo ogbe ne, ijesu o fie lase je ashini o da-ya, o ya so iromhi.

³⁶ ISamo ali apfo ni e kpole, e vu ya nono o.

³⁷ Abi e ro me o, ee o, "Egbo kpa ee nono e."

³⁸ Ijesu oo we, "Awa mema ya je eoli oboese, ikhi apfe eni e timama akana, ni mhi li la oobo tse abo, irari khi ona o ze ni mhi ro bhale."

³⁹ Igho o kia gase eke iGalili nya tse abo. O la owa ugamhi eyewe tse abo. O khu egbo ayemhe ebe egbe ku-a.‡

*Ijesu o ri oni efafe e mu ze
(iMat 8.1-4; iLuk 5.12-16)*

⁴⁰ Omose ni efafe e mu o bhale deba ijesu. O wugha li odalo, oo lema li, oo, "Ini o ghole e, u dobe ya remhe ze, u remhe khi oni o pfafe."

⁴¹ Igho elemhi o, ee ala ijesu, o nise obo-a ti oni omose, oo li, "O ghole mhe, khi oni o pfafe."

⁴² Aghoaghо eni efafe e lase o egbe le, o ze, o khi oni o pfafe.

⁴³ Ijesu o gueye o, o ke vu. O lolo tse agua ye o,

⁴⁴ oo li, "Khi gue ingme ona ye ogbokhoghuo, ama le ya ri egbe e khafe ekpodalo-ugamhi eyi Eshinegba, ni e te okpe ne, ni u luase obo ni iMosisi oo a ke luase, ini a ri ogbo lina ze. Ishegho, ni o khi otfelena we khi u she ze."§

⁴⁵ Eri oni omose o ri ochogho ngme o kiakiala gboo, o miatse oni ingme onete ku asha kpa. Itobo ona, ijesu o ke dobe lo eoli okhoghuo le gboo. Eri

‡ 1:39 Li ze iMat 4.23; 9.35 § 1:44 Li ze iLev 14.1-32

o ke la odagbe obini o da-ya. Abi o rię khi igho, eri egbo nya e kie rote asha kpa e bhale deba li.

2

*Ijesu o ri omose ni o guoghọ-a ze
(iMat 9.1-8; iLuk 5.17-26)*

¹ Ikuku ogbele e dose, ijesu o gbo lo elemhi iKapanomu, eni egbo e suo khi o she bhale apfe.

² Ebubu egbo e le gba ramhi ni ogbo a ke me ashikhoghuo ni o kpole, ya ramhi olase unu-ode. Ijesu o tse abo oni usomhi ye we.

³ Igho emose aane e tsua omose ni o guoghọ-a adigege shi iya bhale ghi ijesu.

⁴ Abi eni emose e a ro me asha tsua li lole ashini ijesu o la, itobo egbo ni e gho bu dose, e nga ukhomhi oni owa rote ashini ijesu o la gbese ekpha-a. Abi e ro gbese oia se, e ri ili ri oni omose tiemhile, abi o kie li yeshi iya. ⁵ Abi ijesu o ro me irudunga oyewe, oo oni omose ni o guoghọ-a, “Ominhe, a she ri olamhe topfa e.”

⁶ Ama eni e sese Ishi eyi iMosisi ni e shito akaghọ, e sa o udu oyewe, e lie,

⁷ “Elo o ze ni oni ogbo ona o ro ngme ungmehi onana unu. Eri o pfi unu-a! A li me oni o dobe ya gbe olamhe kua na ogbo? Oa khi Eshinegba lueghuo?”

⁸ Aghoghọ ijesu o she lese elemhi ayemhe oyoli emini e sa shi elemhi udu oyewe, oo we, “Elo o ze ni a ro sa usamhi onana.

⁹ Onoghuo o kele ne, ni a ro lie oni omose ni o guoghọ-a, ‘A ri olamhe topfa e,’ abi khi ‘Vule, rue iya oye ni u ke kia?’

10 Mhi ya rọ li khase ẹ khi Omi Ogbọ ọ mholi ekpabọ elemhi agbọ ona ni ọ rọ gbe olamhẹ kua na ogbọ.” Ighọ ọ gueye ọni omose ni ọ guoghọ-a eghọ,

11 “Mhiye ye u vule, u rue iya oyẹ, u ke je apfe.”

12 Oni omose ọ vule, ọ rue iya oyọli, ọ la akpewe nya kia vu. O ri abọ sha ẹgbọ kpa. Ee kuẹghie Eshinegba, e lie, “Anye ẹa kpe me onana ghue oo!”

Ijesu ọ lu iLevi

(iMat 9.9-13; iLuk 5.27-32)

13 Ijesu ọ gbo je epfe okẹ oniemi ni o khishi. Ebubu ẹgbọ e bhale deba li, ọ sese we.

14 Abi ọ kia le, ọ me omionoga iLiva omi Afeusi khi ọ shito okholo eyi eni ẹ mie oga. Ijesu ọọ li, “Deba mhe.” Ighọ ọ vule deba li.

15 Abi ijesu ọ la ayi iLevi le eminale ẹlogbomhi, emionoga ni e bu ali ẹgbọ ena olamhẹ e li nu ọli ali eniye odukhokho eyọli le emhi, irari khi ẹgbọ ni e bu e deba li.

16 Abi ẹgbọ eni ẹẹ sese ishi na lui iFarisi e rọ me khi ijesu ọ nu egbushia ali emionoga ẹ le eminale, e mhila eniye odukhokho eyọli, “Elo o ze ni ọ rọ nu emionoga ali egbushia ẹ le eminale?”

17 Ijesu ọ suo onana, ọọ we, “Egbọ ni e ze ẹa mhuẹ emini e ri obo ẹ li. Oni ọọ to, ọ ye apfe obo. Oa khi eni e pfuase ne mhi bhale ya lu, ama egbushia.”

Omhila ingme azumhi

(iMat 9.14-17; iLuk 5.33-39)

18 Eghẹghẹ oghuo eniye odukhokho eyi iJoni Oni ọọ batazi ẹgbọ ali ẹgbọ iFarisi ee pfi azumhi. ẹgbọ eghuo e bhale ya mhila ijesu, ẹ ọli, “Elo o ze ni eniye odukhokho eyi iJoni ali enayi ẹgbọ iFarisi e rọ pfi azumhi ni eye ẹa rọ pfi?”

19 Ijesu o sọ wẹ o, oọ wẹ, “Sẹ epfese eyi omose ni o rue omueshi onogbo e liẹ ke pfi azumhi ini oni omose o kie nu wẹ shito? Eẹa mẹ asha pfi azumhi ini o kie nu wẹ shito.

20 Ama eghẹghẹ o ya bhale ni a rọ rue oni odo oni omueshi vu. Eghẹghẹ agho, e rọ tigbe ya ke pfi azumhi.

21 “Ogbo a ya khi ode onogbo gbela ma ode onodio. Ini u ligho, eri oni ode onogbo o ya nyanọ oni ode onodio-a. O ke nyanọ-a doşẹ abi o kpẹ li.

22 Ali khi ogbo oya ya ku onyo onogbo shi akpaba onodio. [Ikhi akpaba ni egbo iJu e ku onyo shi.] Ini u ligho, eri oni onyo o ya veşẹ oni akpaba-a. Oni onyo ali oni akpaba e ga li opfu-a. Akpaba onogbo a ku onyo onogbo e lo.”

Onomhue oyi ogbele iyemhea
(iMat 12.1-8; iLuk 6.1-5)

23 Ogbeleghuo ele iyemhea oyi egbo iJu, ijesu o rọte ifui ishemhi iakpa kia doşẹ. Eniye odukhokho eyoli e li nu oli kia. Igho e li be eni iakpa.*

24 Igho iFarisi e mhila ijesu, “Elo o ze khi eniye odukhokho eye e e ri ele emini a ghue ele iyemhea?”

25 Ijesu o sọ wẹ o, oọ, “Aa kpẹ mẹ oli ze Ebe-nopfuase emini Oghie iDefidi o ri ele abi okiamhi o rọ gbe oli ali eni e nu oli kia?”

26 Eghẹghẹ ni Abiata o rọ khi Okpeda na ekpodalo-ugamhi eyi Eshinegba, ni Oghie iDefidi o rọ lo Owa oyi Eshinegba ya rue ibuledi ni a rọ ga Eshinegba le, o kholo na eni e nu oli kia le. Ibuledi

* 2:23 Li ze iDeut 23.25

ona ighie eyi ekpodalo-ugamhi tṣe, ushi o lama e ke le wṣe.”†‡

²⁷ Igho oṣo wṣe, “Eri a ma ogbeṣe iyemhṣa na oḡbo, aa ma oḡbo na ogbeṣe iyemhṣa.

²⁸ Itobo igho, Omi Oḡbo o khi Onomhuṣe, li shi oyi ogbeṣe iyemhṣa.”

3

Omose ni o ghu obo oghuo-a (iMat 12.9-14; iLuk 6.6-11)

¹ Eṣeṣe khi iJesu o gbo je owa ugamhi, omose ni obo oyoli oghuo o ghua, o la akaghṣo.

² Eḡbo eghuo e nono ashini e te ya meṣa gue ingme shi iJesu egbe. E ri ukpeṣe shi oṣi egbe ini o ya ri oḡbo ze eṣe iyemhṣa.

³ IJesu oṣo oni omose ni o ghu obo-a, “Vule migha odalo oyi eḡbo kpa.”

⁴ IJesu o mhila wṣe, “Onoghuo o gbe akanya elemhi ushi oyawa ne eṣe Iyemhṣa? Ni a ro riṣe onete abi ni a ro riṣe onobe? Ni a ro tsumhi agbo oyi oḡbo abi ni a ro pfuse oṣia?” Ama e tsaghie a.

⁵ Igho iJesu o ri elemhi ibibi bino wṣe gase, udu oyoli o yese-a shi udu obe ni e mhue. Oṣo, “Nomose nise obo-a.” O nise oṣi-a. Igho obo oyoli o gbo li abi o kpe te eke li

⁶ Igho eḡbo iFarisi e fiṣe deba eniye odukhokho eyi Eroṣu, e ya gba ugbamhi abi e li ya gbe iJesu-a.

Ebubu eḡbo e deba iJesu

† 2:26 Li ze iLev 24.9 ‡ 2:26 Li ze 1 iSam 21.1-6

⁷ Igho iJesu ali eniye odukhokho eyoli e lase we iteva le ya je okẹ na iGalili. Ebubu ẹgbọ e rọte iGalili deba iJesu.

⁸ Abi e rọ suọ emini o riẹle, ebubu ẹgbọ e bhale deba li, rọte ekẹ iJudia ali iJerusalemu, ali Idumia ali ekẹ ni o kpe obọ na iJodani ali epfefefe iTire ali iSidoni.

⁹ Itobọ khi eni ẹgbọ e bu dọse, iJesu o gueye eniye odukhokho eyoli e nono okọ-okẹ oni ikeke ni loli lo o ini ẹgbọ e khi sha mu luẹ.

¹⁰ Itobọ khi o she kpe ri ebubu ẹgbọ ze, ẹgbọ eni ẹa ze, e mise egbe ini e me asha ramhi oli egbe ri obọ ti oli.*

¹¹ Eghẹghẹ kpa ni ẹgbọ ni ayemhe ebe e yese e ngme e rọ da me iJesu ne, e de ya yeshi ekẹ odalo oyoli. Eẹ tseşe, eẹ liẹ, “Omi Eshinegba u khi.”

¹² Ama, o tse agua ye eni ayemhe ebe egho e khi gue oni loli khi le.

*Ijesu o ze ighiusomhi na ke ogbava
(iMat 10.1-4; iLuk 6.12-16)*

¹³ Ijesu o nga ukhomhi ute, o lu emose ni e ghole oli. E bhale deba li.

¹⁴ O ya ze ẹgbọ ogbava ke, o lu we ighiusomhi na ke. O ze we ni e nu luẹ ke kia, ali ni luẹ me we ke ghie usomhi fiẹ ke tse abọ usomhi onete,

¹⁵ ali ni e gbo mhue ekpabọ ni e rọ ke khu ẹgbọ ayemhe ebe egbe kua.

¹⁶ Ena e khi otuogbava ni o ze. ISamọ, oni iJesu o lu iPita.

* **3:10** Li ze iMak 4.1; iLuk 5.1-3

17 IJemhisi ali inyoghuo-oli iJoni imi iZebedi (eni iJesu o ri akiseva iBonajisi na. Ni o migha shi Imi Akphala),

18 Ali Aduru, iFilipu, iBatolomiu, iTomosi, iJemhisi omi Afeusi, ali iTadiusi, iSamọ [oni ije-odalo oyi edeli iJu oo ghọ mu egbe.]

19 Ali iJudasi Isikaroti oni o ri iJesu de.

Ijesu ali iBezebo

(iMat 12.22-32; iLuk 11.14-23; 12.10)

20 IJesu o nyene egbe je apfe. Igho ebubu egbo e gbo tigbili ramhi khi iJesu ali eniye odukhokho eyoli ea me asha, we khi eminale e ya le.

21 Abi apfe o e ro suo ona, E nono khi wewe e ya mu oli je apfe. Irari khi eri e lie, “Ujili o she e kphali.”

22 Eni ee sese ishi ni e rote iJerusalemu tiemhie, e lie, “Ayemhe iBezebo ni o khi Okphaghie o la li egbe yese oli e ngme! Loli o khi oghie oyi iyemhe ebe ni o ri ekpabo na li ni o ro ke khu egbo iyemhe ebe egbe kua.”†

23 Igho iJesu o lu we, o ri okhe irokhokho nu we ngme, Oo we, “Se okphaghie o lie ke khu okphaghie?”

24 Ini ushishi e kemhi egbe we shi ikui-iku ni e ro nu egbe we e kholi, eri oni ushishi oo de.

25 Ini omhue-apfe o kemhi shi ikui-iku ni e ro nu egbewe e kholi, eri oni omhue-apfe o ya de.

26 Ini okphaghie o mu okholi vule shi egboli o, oa ya to, eri o ya de, ukpese oyoli o she ramhi.

27 “Ogbo okhoghwo oa la o ni o dobe ya lo owa oyi omose-akama ya ti oli itsua eke-a ini oa kpe mu oni

† 3:22 Li ze iMat 9.34; 10.25

omose-akama ge shi eke. Egegehe agho, o tigbe dobe ti oli itsua eke-a.

²⁸ “Egbegbi ingme mhi gueye e, khi, aa me olamhe ni ogbo o lamhe ali ungmehi ipfiunu-a ni ogbo ya ngme, ni aa dobe ro ya gbekua na li.

²⁹ Ama onini o da ngme ungmehi ipfiunu-a deba Ayemhe-no-pfuase ne, aa ya ro topfa li, irari khi olamhe ona agboagbo o pfi obo lo.”‡

³⁰ Itobo khi e oli khi, “O mholi ayemhe ebe,” o ro ngme ona.

*Inyo iJesu ali inyoghwo oli eni emose
(iMat 12.46-50; iLuk 8.19-21)*

³¹ Igho inyo iJesu ali inyoghwo oli ee bhale. E migha oolase. E ghie ogbo o ka lu iJesu ghi ewe.

³² Ebubu egbo e shito gaso oli. E bhale ya gueye oli khi inyoli ali inyoghwo oli e la oolase, khi ee nono ni wewe e me oli.

³³ O mhila we, “Eghwo e khi inyemhe ali Inyoghwo-mhe?”

³⁴ Igho o bino eni e shito gaso oli, oo, “Enana e khi inyemhe ali Inyoghwo-mhe!”

³⁵ Onini o da riele emini e ghole Eshinegba, o khi Inyoghwo-mhe onomose ali onokpotso ali inyemhe.”

4

*Okhe irokhokho oyi oni o ko ikpamhi emhi
(iMat 13.1-9; iLuk 8.4-8)*

¹ IJesu o ke gbo la epfe oke ni o khi shi na iGalili sese. Egbo ni e le gaso oli e bu dose ramhi ni o ro ya lo elemhi oko-okhe shito. Oni oko-okhe o la elemhi oni oke. Eni egbo e ke migha egele eseso oni oke.*

‡ 3:29 Li ze iLuk 12.10 * 4:1 Li ze iLuk 5.1-3

² Emhi ebubu ọ ri okhe irọkhọkhọ ọ sese we. Ọọ we.

³ “A ghe i! Oghiale ọ ya la ọ. Ọ fiẹ yá kọ iakpa.

⁴ Abi ọ li kia miatse eni iakpa, ikpamhi eghuo ọ e de kua ode, igho ipfeli e bhale ya sanọ we le.

⁵ Eghuo ọ, e de kushi eke ni o khi okpegbhe, ni eke ẹa lolo la. Igho e nyanya ze, e fu, ama oni eke ọa limhi.

⁶ Ama abi ovọ o rọ to, o tose we a, e khakha, itobo khi ẹa me eke ni o limhi pfi imhili lo.

⁷ Ikpamhi emhi elese e de kulo ifui igba. Igho igba e ze lasele tonon eni iakpa abi e rọ fu vule. Itobo igho, ẹa ke dobe ni e fu nyanọ ekhe lasele.

⁸ Ama ikpamhi eghuo, e de shi eke onete. Eni ikpamhemhi e ze, e fu, e nyanọ ekhe lasele. Eghuo ọ, e mhue ikpamhi uye ali igbe, eghuo ọ, e mhue ikpamhi egbhueshe, elese e mhue egbhueshe.”

⁹ Igho iJesu, ọọ, “Oni ọ mhọli esọ, ọ suọ.”

*Emini o ze ni a rọ ze oni okhe irọkhọkhọ
(iMat 13.10-17; iLuk 8.9-10)*

¹⁰ Abi iJesu lolighuo ọ rọ shito, eniye odukhokho ogbava eyoli ali egboese ni e li suọ abi ọ rọ ngme, e bhale deba li, ọ gueye we emini ọ ri oni okhe irọkhọkhọ ngme.

¹¹ Ọọ we, “A she ri osheli oyi Eghiele oyi Eshinẹgba na ẹ. Ama okhe irọkhọkhọ a rọ gue ungmehi nya ye egboese.

¹² Ni a bhale ya ẹ khi,
“E kha riẹ nya alo-a shi eke
ẹa tigbe ya me emhikhoghuo,
ali e kha riẹ ku esọ a shi eke,
ọa ya lo we esọ.
Irari khi ini ọa khi igho,

e dobe me eke, e suo eso,
e mu pfi deba Eshinegba,
o ro topfa we.”†

*Ijesu o guele emini oni okhe irokhokho o ngme
(iMat 13.18-23; iLuk 8.11-15)*

¹³ Ijesu o mhila we, oo we, “Aa lese emini a ri okhe irokhokho ona ngme? Se a li tigbe ya lese emini a ri okhe irokhokho okhoghuo ngme sho?

¹⁴ Eni iakpa ni oni oghiale o miatse e ku, e migha shi ungmehi oyi Eshinegba.

¹⁵ Eri ikpamhi iakpa ni e de shi ode e li abi egbo eghuo ni e kha da lese suo oni ungmehi ne, Okphaghie o bhale ya rue we lue udu le.

¹⁶ Ikpamhi emhi ni e de shi eke ni o li echeche, e li abi egbo ni e kha da lese suo oni ungmehi ne, e ri udu oghel mie oli.

¹⁷ Ama, o a ya tiemhi we eke elemhi. Ea dobe migha tese, itobo khi o a pfi imhili lo eke. Itobo igho, ini omunu o bhale ali ni a ro mu okholi vule shi we o rote oni ungmehi ni e suo, e kele de ode-

a. ¹⁸ Ikpamhi emhi ni e de pfilo ifui igba eri e li abi egbo ni e kha suo oni ungmehi,

¹⁹ isamhi ingme agbo ona, ali oghuemhe epfue, ali oghuemhe khi oghuemhe e lu guese oni ungmehi-a, ee tono oli igba, itobo igho o a mo imomhi.

²⁰ Ama ikpamhi emhi ni e de shi eke onete, e li abi egbo ni e suo ungmehi, e mie oli suo, e mo imomhi enete. Eghuo e mhu e ikpamhi uye ali igbe, eghuo e mhu e egbhuese. Eghuo, e mhu e egbhuese.”

† 4:12 Li ze Aza 6.9,10

*Ákpá ni a rọ nga ukhomhi asha
(iLuk 8.16-18)*

21 Ijesu ọ gbolo ẹ wẹ “Ọgbọkhọghuo ọ́ọ́ ya ri ákpá ru lasele, ọ́ ya rue atalabi guese ọ́li mu eke, wẹkhi eri ọ́ ke ya rue ọ́li ya sheli ufui ukpho?‡

22 Emiemini a rọ sheli, o ya lasele gbo alo gbugbugbu. Aa mẹ emhi osheli ni aa ya khueghie a. §

23 Ọnini ọ́ mhọ́li esọ́, ọ́ ri esọ́ shi eke ni ọ́ suọ́.”

24 Ọ gbolo ẹ wẹ, “Emiemini u da suọ́ kpa, sa ọ́ bie! Emiemini u da rọ́ shi ushi rọ́ gue ẹgbọ́ese ẹzọ́, Ẹshinẹgba ọ́ li ya rọ́li gue ẹ ẹzọ́. Oye o gbo ya ze ne.

25 Ọni ọ́ kpẹ́ mhọ́li ne, a ya gbo rọ́ ma ọ́ na li, ama ọ́ni ọ́a mhọ́li a ya mie ọ́li ukukuọ́ ni ọ́ gbo mhọ́li.”*

Okhe irokhokho oyi ikpamhi emhi ni ọọ zẹ

26 Ijesu ọ́ gbolo ẹ, “Abi Eghiele oyi Ẹshinẹgba o li na. Eri o li abi ini ọ́mọ́se ọ́ miatse ikpamhi iakpa kia ku shi eke.

27 Obili o kha bi, ọ́ ya lese a, ogbe o kha gbe ọ́ guale, ama eni ikpamhi emhi ẹẹ zẹ lasele, ẹẹ fu vule. Ama ọ́a ya lese abi o li kia.

28 Eke lẹ́lighuo ọ́ lese abi o li ri emhi ẹkọ́mhi ẹẹ bie. Oni odode, o kha zẹ ukhuli, o ke fu vule, o nyanọ́ ifele, o ya ri umọ́mhi lasele.

29 Eni iakpa e kha da bie ne, ọ́ni ọ́ gua wẹ ọ́ rue agaga ya gbe wẹ, itobọ́ khi ẹghẹghẹ ikhiẹse o ramhi.”†

*Okhe irokhokho oyi ukpamhi ọ́ọ́ra imositadi
(iMat 13.31-32,34; iLuk 13.18-19)*

‡ 4:21 Li zẹ iMat 5.15; iLuk 11.33 § 4:22 Li zẹ iMat 10.26; iLuk 12.2
* 4:25 Li zẹ iMat 13.12; 25.29; iLuk 19.26 † 4:29 Li zẹ iJọ 3.13

30 IJesu ọ gbolo ẹ wẹ, “Elo awa mema ri Eghiele oyi Eshinegba ya khokho? Okhe irokhokho onoghwo awa mema ya ze roli lo egbo eso egbo o?”

31 Eri o li abi ukpamhi ọara imositadi ni ukpamhi ọli o she ne nya agbo ona, ni ogbo ọ ro ko eke.

32 Ini a roli ko, o ze, o fu vule, o mele unyanọ ni o fune a shi ishemhi, ni o mhọli iguabo eniemhi, ni ipfeli ẹ bhale ya ku eko shi.”

33 Okhe irokhokho enana iJesu ọ ro nu wẹ ngme oni ungmehi, ramhi ashini o lo wẹ eso ramhi.

34 Aa me ungmehi ni ọ nu wẹ ngme, ni ọa ri okhe irokhokho nu wẹ ngme. Ama ini o de te ọli ali eniye odukhokho eyoli, ọ ro ri emini ọ nu wẹ ngme nya a lo wẹ eso.

*IJesu ọ pfomhise akpekpeli
(iMat 8.23-27; iLuk 8.22-25)*

35 Eje ogbomhi elegho, iJesu ọọ eniye odukhokho eyoli, “Awa da je ukiekie oke obini o kpole.”

36 Igho e ze egbo ni e legba obo shi agho, eni eniye odukhokho e ya lo elemhi oko-oke oni ikeke ni iJesu ọ she lo shitọ. E gua li vu. Oko-oke elese e li deba wẹ vu.

37 Utoghuokpe, akpekpeli oniemhi oo li, oo zughuse oni oke, ni amẹ e fiase kulo elemhi oni oko-oke, ramhi ni o ro vo amẹ. Ukukuọ o kpole ni ọa ro kulue.

38 IJesu ọ la ukhokho oni oko-oke oniemhi, ọ lese-a ri ukhomhi nga akpesukhomhi. Igho eniye odukhokho eyoli e guise ọli le. E ọli, “Osese, wa bie ga lie ini awa ghọ ghua?”

³⁹ Igho iJesu o ti vule, o dese oni akpekpeli, oo li, “Li tsuke.” Igho oni akpekpeli o pfomhe te. Asha kpa o pfomhe tsuke.

⁴⁰ Igho iJesu oo eniye odukhokho eyoli, “Elo o ze ni a ro ligho o na ulishi. Eri aa kie mholi irudunga?”

⁴¹ Ulishi oo mu we, e mhila egbe we, “Oghuo ona o khi? Ghe akpekpeli ali izughuse oko e ga suo eso a na li.”

5

Ijesu o ri omose ni ayemhe ebe o la egbe ze (iMat 8.28-34; iLuk 8.26-39)

¹ Ijesu ali eniye odukhokho eyoli e da oko iGalili je ukiekie eke iGerasenesi.

² Abi iJesu o lese rote elemhi oko-okoko lasela, omose ni o mholi ayemhe ebe, o rote atalimhi ni o la agho bhale deba ijesu.

³ Ifui atalimhi oni omose oo la. Ogbokhoghuo o ke dobe ri iweghe ge o.

⁴ Eghenge kpa, a ro ri iweghe ge o abo ali awe, ama eri oo kphuru we a, o taghie we a, o shashe we a. Ogbokhoghuo o dobe mu o.

⁵ Nobi-nogbe o ro la ifui atalimhi ali ikhomhi ite dudu gaso. Oo pfi okokokhue. O ri eche fiano egbe o.

⁶ Abi o lese ta pfia me ijesu te, o na bhale ya wugha li odalo.

⁷ O tse se leghe, oo, “Ijesu Omi Eshinogba ni o Yagha Ne Nyaa, elo wa nono mhe egbe? Mhi ri Eshinogba lema e khi na mhe osoli!”

8 Itobọ emini ọ rọ ngme na khi, iJesu ọ she kpẹ gueyẹ ọli, “Yẹyẹ ayẹmḥẹ obe, lase ọni ọmọse ọna egbe le.”

9 Ighọ iJesu ọ mhila li, “Sẹ a lui eva oye?” Oọ, “Eva oyẹmḥẹ o khi Olele ẹgbọ, itobọ khi anye bu gba.”

10 Ọ gbo lema iJesu ọ kpẹkpẹ, ọ khi khu ẹwẹ oni ekẹ ya lase.

11 Igulu ni e bububu e la epfẹ ute ni o la aghọ le eminale.

12 Eni ayẹmḥẹ e lema iJesu, “Khu anye ya lo igulu eghọ, zẹ ni anye ya lo wẹ egbe.”

13 IJesu ọ ri ẹghẹghẹ na wẹ, e ka lo eni igulu egbe. Ighọ e rọte ọni ọmọse egbe lasele e ya lo eni igulu egbe. Eni igulu ni e ramhi agbẹlẹ eva, e rọte egele na ya kulo oni okẹ, e ghuloa nya.

14 Eni e ri ukpẹloẹ ẹ khu eni igulu e na je ifui apfẹ ali ẹoli nya ni e la oni ekẹ ya guele emini a mẹ. Ighọ ẹgbọ e bhale ya bino emini a mẹ.

15 Abi eni ẹgbọ e rọ bhale deba iJesu, e mẹ ọni ọmọse ni ayẹmḥẹ ebe ni e bu e kpẹ la egbe, khi ọ shitọ aghọ, ọ ri itsua sọ, ẹgbhali eyọli e she gba na li. Ulishi oo mu wẹ.

16 Eni e mẹ emini a mẹ e gueyẹ ẹgbọ emini ọni ọmọse ni ayẹmḥẹ obe e la egbe ọ mẹ egbe ali emini e li eni igulu.

17 Ighọ, e gueyẹ iJesu ọ lase wẹwẹ ekẹ le.

18 Abi iJesu ọ lo elemhi ọkọ-okẹ oniẹmhi khi ọọ ke vu, ọni ọmọse ni ayẹmḥẹ ebe e kpẹ la egbe, ọ lema iJesu ọ zẹ ni lọli deba li vu.

19 Ama iJesu ọa lama na li. Ọ ri ochoghọ liẹ ọli, “Ke je apfẹ ni u ya gueyẹ ẹgbọ ena unuekpẹ oye emini Ọnọmhuẹ ọ riẹlẹ nẹ, ali abi ọ li lẹ elemhi ẹ.”

20 Igho oni omose o lui ifui eoli igbe ododa ena eke iDikapolisi. O kia gueye egbo abi iJesu o li riye na lue. O ri abo sha egbo nya.

*Omueshi ni o ghu-a ali okpotso ni o lia ee ku egbe
(iMat 9.18-26; iLuk 8.40-56)*

21 Abi iJesu o ro gbo nyene egbe da je ukiokie oke obini o kpole, egbo e le gaso o li.

22 Omose oghuo ni a lu iJarosi, ni o khi otuoghuo eni e mheso shi owa ugamhi, o bhale akaghoo. Abi oo me iJesu te, o de ya wugha li odalo.

23 O mema lolo lema li, oo li, "Omimhe oni omueshi o ma ghua gba memena, kpekpe bhale ya ri oboto o li egbe ni o ze, ini o khi ghua."

24 Igho iJesu o deba li vu.

Igho ebubu egbo e deba li e ve mu o li.

25 Okpotso oghuo o la agho ni o she ku o lia ishito egbe ramhi ikpe igbeva.

26 O she me osoli oboto oyi ebubu egbo abi o ro kia dua oni ughuamhi. O she ri epfue eyoli nya dua o, ama oa pfo, oo ga kholo o li egbe.

27 Abi o ro suo ingme oyi iJesu, igho o te ifuaboto oyi egbo ri oboto o li awulu ni o so.

28 O ro li shi udu khi, "Ini mhi da me asha ri oboto o li awulu ne, mhi ya ze."

29 Abi o ri oboto o li awulu te, eni o lia ni e ku o li egbe, e khakha utoghuo kpe. Aghoaghoo o lese khi emini o yese lue e ngme, khi o pfo.

30 Aghoaghoo, iJesu o lese khi itoto o she rote lue egbe ya lase. Igho o migha, o mu egbe pfi iteva egbo ni e sha mu o. O mhila we, oo. "Oghuo o ri oboto o mhe awulu?"

31 Eniye odukhokho eyoli eẹ ọli, u ga me abi egbọ e liẹ ve mu ẹ, u kiele ẹ mhila, “Oghuo ọ ri obọ ti mhe?”

32 Ama, iJesu ọ kie bino gase ini ọ me oni ọ ri obọ ti ọ.

33 Abi oni ọkpotoso ọ rọ me abi o ke li ọli egbe, ọ bhale odalo oyi iJesu ya wugha, ulishi o mema mu ọli, ọ gue igesikia le abi o ga li kia nya.

34 IJesu ọọ oni ọkpotoso, “Omi mhe, irudunga oye o she mie ẹ pfuese. Ri opfomhe ke je, anasemhe oye o she pfo.”

35 Abi iJesu ọ kie li ngme, emose eghuo, e rote owa oyi iJarosi bhale. Eẹ iJarosi, “Omiẹ ọ she ghua, khi ke yese Oseşe ngme.”

36 IJesu ọa fe ri eso shi emini e ngme, ọọ oni omose “Khi ze ni ulishi o mu ẹ, ama lese mhọli irudunga.”

37 Ọa ze ni ogbokhoghuo ọ deba li se ni iPita, ali iJemhisi ali iJoni inyoghuo iJemhisi.

38 Abi e rọ bhale owa oyi iJarosi, iJesu ọ me abi egbọ e li i kpe okeke, ni e li i vie gbii.

39 Igho, ọ lo elemhi oni owa, ọọ, “Elo o pfi onyaghu onana? Elo o re ẹ vie? Oni omọ ọa ghu, eri ọ lese a.”

40 Ama eni egbọ e gia li. Abi ọ rọ khu we fiẹ se, ọ rue ita ali inyo oni omueshi ali eniye odukhokho otuase egho mhuẹ obọ je ashini oni omọ ọ yeshi.

41 IJesu ọ mu ọli obọ, ọọ oni omueshi, “Talita kumi.” Emini a ri ona ngme khi, “Onomueshi, mhiẹ ye u vule.”

42 Utoghuo kpe, oni omueshi ọ vule, ọ kia gase. [Omọ ikpe igbeva ọ khi.] Abi a rọ me ona, o ri abọ sha we.

⁴³ Ama iJesu o lolo tsē agua yē wē e khi gueyē oḡboḡkhoghuo. Oḡ wē, “A ri emhi na li le.”

6

A ri ukpēloe gbe iJesu obini iNazarēti

(iMat 13.53-58; iLuk 4.16-30)

¹ IJesu o rōte aghō vu jē ̄oli oyoli, eniyē odukhokho eyoli e deba li.

² Oḡbēlē iyemhēa oyi eḡbō iJu o ramhi, oḡ sēsē elemhi owa ugamhi. O ri abō sha ebubu eḡbō eni e ri esḡ shi ̄oli o.

E mhila egbe, “Obo ̄oni ̄omosē ̄ona o rōte mē eni emhi enana? Ilesingme nabi onoghuo na ni a rō na li, ni o gbo rō gbe ikanya ̄onyaloe?”

³ ̄Ona ̄oa she khi ikapita, omi iMeli, ni o gbo khi inyogh̄uo iJemhisi ali iJosisi ali iJudasi ali iSamḡ? Ena ̄ea khi inyogh̄uo ̄oli eni imueshi, ni e ga li nu awa la akana enana?” O ri elemhi bi wē.

⁴ Ama iJesu oḡ, “Ashakpa a la mu ekpē na omekeḡuele, sē ni apfē oyoli ali unueḡkē oyoli aa la mu ekpē na li.”*

⁵ Oa doḡē la akaghḡ gbe akanya ̄onyaloe okhogh̄uo, sē ni ikuku eḡbō ni ̄ea ze ni o rō ze abi o rō ri obō ti wē.

⁶ Umha-mhḡli irudunga oyewē o ri abō sha iJesu. Ighḡ iJesu o kia rōte ̄oli jē ̄oli sēsē eni eḡbō.

IJesu o ghie eniyē odukhokho etuogbava fīe

(iMat 10.5-15; iLuk 9.1-6)

⁷ O lu eniyē odukhokho etuogbava eyoli tigbili, o ghie wē ava-ava fīe, o ri ekpabō na wē ni e rō mhuē itoto rō khu ayemhē ebe.

* **6:4** Li zē iḡn 4.44

8 O gueye we, “Ini a le, a lese rue orokpo mhue obo, a khi tsua eminale, wekhi akpaba ni a pfi e so, wekhi ukpagho.

9 A so ekuẹ, ama a khi tsua awulu olese ma oni a ro so.

10 O gbolo e we, a kha da lo apfe okhoghuo le ni e ro da mie e, a la akagho ramhi ni a ro ya rote oni eoli vu.

11 Ini o khia khi a bhale eoli okhoghuo khi eni egbo ea mie e, ni ea ro gbo ri esọ shi emini a ngme, a rote agho vu. A kpe abo o-a na we, a rote agho vu. Eri ona o ya khi otsele shi we egbe.”†‡

12 Igho e fie ya tse abo gase, e lie egbo e rote olamhe oyewe mu pfi.

13 E khu ebubu egbo ayemhe ebe egbe-a, e ri oili to eni eeghua ebubu egbe, e rewe ze.§

Eghuli oyi iJoni Oni oọ batazi
(iMat 14.1-12; iLuk 9.7-9)

14 Eghẹghe ana, oghie Erodu o li suo eko eni ingme ena nya, itobo khi eva oyi iJesu o she gase asha kpa. Egbo eghuo e lie khi iJoni Oni oọ batazi lo ni o nyene egbe bhale agbo, loli o ze ni o ro ligho mholi ekpabo ro gbe ikanya onyaloa.

15 Egbo eghuo e lie khi, “Elaja Omekeguele o khi.” Elese e khi, “Omekeguele nabi emekeguele ena elee o khi.”*

16 Ama abi Erodu o ro suo ona, o ke, “iJoni, ni mhi khi ukhomhi o, a rote eghuli guise le!”

† 6:11 Li ze Ika 13.51 ‡ 6:11 Li ze iLuk 10.4-11 § 6:13 Li ze iJem 5.14 * 6:15 Li ze iMat 16.14; iMak 8.28; iLuk 9.19

17 Itobọ khi Erọdu ọọ ke mhẹsẹ a mu iJoni gẹ pfilo owa ighumha. Ini egbe e ba mu Ẹrodiasi. Eri Erọdu ọ mie iFilipu inyoghuo ọli Ẹrodiasi.

18 Eghẹghẹ kpa iJoni ọ rọ gueyẹ Erọdu khi, ọa ti ni ọ rue ughuẹ inyoghuo ọli shi.†

19 Itobọ ona, ọni Ẹrodiasi ọọ biselemhi iJoni, ọọ nono ode ni ọ te ya gbe ọli-a, ama ọa dobe.

20 A gbo bhale ya ẹ khi Erọdu ọọ na ulishi iJoni itobọ khi ọ leşẹ khi iJoni khi ọgbọ onete ali ọgbọ ọ ni ọ pfuasẹ ọ khi. Ọ ri irarighọ ri ukpeloe ẹ khu ọli. Ọ ma nono ni lọli ri esọ ke shi ungmehi oyi iJoni, ini o ri riẹ khia khi ingmemhi eyọli e ma yese ọli udu-a eghẹghẹ kpa ni ọ rọ suọ li.

21 Ikpukhokho ọ, Ẹrodiasi ọ me ashini ni ọ te ya mu ota sọ iJoni. Ighọ ẹlẹghuo ni o ikhi ogbele ni Erọdu ọ rọ mhọli ukue ni ọ rọ yelele ogbele ni a rọ bia li le. Ọ ya luno idenomọ eyọli ali ẹgbọ eni mu ẹloe ali ẹgbọ igomẹti ali eni ẹẹ gbe ikanya igomẹti ni e la eke ijudia shi oni ukue.

22 Abi omọ omueshi omi Ẹrodiasi ọ rọ fiẹ lasele gbe ishimhi, o mema ti Erọdu ali ẹgbọ eni e bhale ya bino ọli ẹloe.

Ighọ ọni oghie ọọ ọni omueshi, “Mhila mhẹ emiemini o ga ghọle ẹ, mhi ya rọli ne.”

23 Ọ romhi isheli khasẹ ọni omueshi, “Emiemini u mhila, mhi ya rọli ne, o kha riẹ khi agbekhi-eva eghiele oyemhẹ.”

24 Ighọ ọni omueshi ọ fiẹ ya mhila inyọ li, “Elo mhi ya mhila?”

Inyọli ọọ li, “Ukhomhi oyi iJoni Ọni ọọ batazi ẹgbọ wa mhila.”

† 6:18 Li zẹ iLuk 3.19-20

25 Aghoaghọ ọni ọmueshi ọ nyanya na ya lo deba oghie, ọ mhila li, “Ukhomhi oyi iJọni Ọni ọọ batazi ẹgbọ mhia nono ni u khi shi ukpeko na mhe memena.”

26 Udu o tode yese oghie a. Ama itobọ ekha ni ọ tse ukpeloe oyi epfese ni ọ lu shi oni ukue, ọa ke dobe ti da oni ekha.

27 Aghoaghọ ọ ghie eni ẹẹ gbolo ẹgbọ-a e ka pfa iJọni ukhomhi ọ bhale. Eni emose e je owa ighumha ya khi iJọni ukhomhi ọ.

28 E rue ọli shi ukpeko bhe. Ighọ oghie ọ kpha li na ọni ọmueshi. Ọni ọmueshi ọ kpha li na inyo li.

29 Abi eniye odukhokho eyi iJọni e rọ suọ ona, e bhale ya tsua etuli oyọli ya rọ tọ.

*Ijesu ọ ri eminale na ẹgbọ agbele ishe le
(iMat 14.13-21; iLuk 9.10-17; iJọn 6.1-14)*

30 Eni ighiusomhi na kee e jele, e le gasẹ ọli, e gueye ọli emini e riele ali emini e sese nya.

31 Ighọ, itobọ ebubu ẹgbọ, ni ee bhale ni ee vu, ijesu ali eniye odukhokho eyọli ẹa me asha le eminale. Ijesu ọọ we, “A bhale ni awa je ashini awa-eghuo tse awa ya la, ni a yemhe-a ukuku ọ.”

32 Ighọ weweghuo tse ee lo oko-okẹ oniemi ya je ashini o da-ya.

33 Ama ebubu ẹgbọ ni e me we abi e rọ vu, e lese khi wewe lo. Ighọ eni ẹgbọ e rọte ẹoli nya ri awe na ya ralo ashini ijesu ali eniye odukhokho eyọli e je.

34 Abi ijesu ọ rọ ramhi aghọ, ọ me abi eni ẹgbọ e bu, elemhi we e lala li. Itobọ khi eri e li abi isumha ni ẹa mholi ọni ọ re we ẹ kia. Ighọ ọ li sese we emhi ebubu.‡

‡ 6:34 Li ze iNọba 27.17; 1 Ighie 22.17; 2 Okhe 18.16; Ezik 34.5; iMat 9.36

³⁵ Eghẹghẹ ana, ogbe o she vu. Igho eniye odukhokho eyi iJesu e bhale deba li, e ke ọli, “Aborokhia khi oola óo nuata shi apfe ena, ni eghẹghẹ o ro she vu dose ena,

³⁶ waa ke gueye eni egbo ena e kia je ifui apfe ya nono emhi de le.”

³⁷ Ama, iJesu ọọ we, “A ri emhi na we le.”

E mhila li, “Ifata eyi ogbele elele eyi ogbo e ya lo ni a ro de ibuledi ghi we le?”

³⁸ Igho iJesu o mhila we, “Iruli ibuledi ingme a mholi shi agho? A ka bino ghue.”

Abi e ro bino se, e ọli, “Iruli we ishe ali ifele aava.”

³⁹ Igho iJesu ọọ we e riele eni egbo shito ikui-iku, ukhomhi ebuli.

⁴⁰ E shito ikui-iku, egbo egbhueshi-she ali egbhue-eveva ali ogbogbe.

⁴¹ Igho iJesu ọọ rue eni ibuledi ishe ali ifele aava egho, o bino idane, o tse Eshinegba uwegbe. O gbe eni ibuledi khia, o ro na eniye odukhokho eyoli e ke kemhi na egbo. O gbo kemhi eni ifele aava na we nya.

⁴² Ogbo kpa o le, o khue.

⁴³ Iku we ni eniye odukhokho eyoli e sanọ eke, e vo ighughu igbeva.

⁴⁴ Emose agbele ishe, e le eni eminale.

*Ijesu o kia ukhomhi oke
(iMat 14.22-23; iJon 6.15-21)*

⁴⁵ Aghoaghọ o ri omọ odukhokho eyoli lo oko-oke oniemi, e ka ralo iBetisaida ya migha khe lue ukiękie obinokpole. Igho o gueye oni ukpokpomhi ebubu egbo e ke je apfe.

46 Abi ọ rọ tse we okhila se nya, ọ nga ukhomhi ute ya sọ iromhi.

47 Ogbomhi ò mu eke, oni oko-okẹ oniemi o kia ramhi iteva oni okẹ, o ke kpe iJesu lolighuo tse le shi eke.

48 Ọ mẹ khi akpekpeli óó nase eniye odukhokho eyoli. O ramhi itsotso ogbie, iteteva elemhi agogo ese ali agogo esesa, ọọ kia ukhomhi oni okẹ le deba we. Ọ she kia ya dose we.

49 Ama abi e mẹ iJesu khi ọọ kia ukhomhi amẹ, e dabi khi ayemhe olimhi lo, e tsesẹ leghe.

50 Itobọ khi eri wewe nya e yila abi e rọ mẹ oli.

Aghoaghọ ọ nu we ngme, ọọ we, “A mholi udu! Mhemhe lo! A khi ke na ulishi.”

51 O lo elemhi oko-okẹ oniemi deba we, oni akpekpeli o pfomhe. O ri abọ sha eni eniye odukhokho,

52 itobọ khi ẹa kie dobe lese udi ingme eminale ni ọ kpe rọ na egbo agbele ishe le; a toto we udu.

*Ijesu ọ la iGenesareti ri egbo ze
(iMat 14.34-36)*

53 Abi e rọ da oni okẹ se, e lasele shi iGenesareti, e mu oni oko-okẹ oniemi zu agho.

54 Abi e lese rote oko-okẹ oniemi tiemhie, egbo e she lese khi iJesu lo.

55 Igho eni egbo e nyanya kia gase oni eke nya, ashiashini e da suo khi ọ da la ne, e tsua eni ẹẹ ghua shi iya bhale agho.

56 Obiobini iJesu ọ da je ne, o ke khi ẹoli ni e gbẹdi, o ke khi enikeke o, ghe ifui ishemhi o, eri ee tsua eni ẹẹ ghua bhale agbagbajighana atuoki. E lema

iJesu o lẹsẹ zẹ ni eni ẹẹ ghua e ri obọ ti o esọ awulu ni o rọ sọ tse. Eni e da ri obọ ti o li nya e ze.

7

Osesẹ oyi ipfuase ni o te ekelele lasele (iMat 15.1-9)

¹ IFarisi ali esesẹ Ishi eyi iMosisi eghuo ni e rọte iJerusalemu bhale, e le gase iJesu.

² E me khi eniye odukhokho eyọli eghuo e ri abọ ni ẹa pfuase ni aa kpe-a a le eminale. [Emini a ri ona ngme khi ẹa kpe abọ-a abi ẹgbọ iFarisi ẹẹ a ke li.]

³ Irari khi iFarisi ali ẹgbọ iJu eni e kpọle nya ẹa ya le eminale ini ẹa li kpe abọ-a. Abi ititawe e sesẹ we na, ni e rọ gbe akanya.

⁴ Ini e rọte oki jele khi ẹa li kpe egbe a, ẹa ya le eminale. E gbo mholi ighuighue ebubu elese ni e gbolo ẹ ghue, Ighuighue abi a liẹ kpe iko, ekhe, itasa ali igege-a.

⁵ Irarigho, eni iFarisi ali esesẹ Ishi eyi iMosisi e mhila iJesu, “Elo o zẹ khi eniye odukhokho eyẹ ẹa ri ishi ni itita awa e rọ shi eke gbe akanya, ni e rọ ri abọ eni ẹa pfuase ẹ le eminale?”

⁶ IJesu odo we, “Igesikia Azaya o ngme abi o rọ ngme ungmehi oyi Eshinegba ni o go lu ẹẹ ni a di egbe ẹ. Oni a keke shi eke khi,

“Ungmemhi unu
ẹgbọ ena e rọ ri ekpe ẹ na mhe,
ama udu oyewe
o nuata shi mhe o.

⁷ Ugamhi afue ẹẹ ga mhe,
ushi eni ẹgbọ e rọ shi eke,

ẹẹ sẹsẹ ẹgbọ.*

⁸ A she pfi ishi eyi Ẹshinẹgba shi eke, a ri osesẹ eyi ẹgbọ ẹ gbe akanya.”

⁹ O gbolo ẹ wẹ, “A ga lẹsẹ ode ni a te ri ishi eyi Ẹshinẹgba shi ukhokho obọ, ini a ba mẹ asha ri osesẹ eyẹ ẹ gbe akanya.

¹⁰ Itobọ khi iMosisi oọ liẹ, ‘Mu ekpe na itẹ ali inye.’ O gbolo ẹ, ‘Onini o da ku itse ni itali okekhi inyọli ne, a gbe oia.’†

¹¹⁻¹² Ama ẹẹ a sẹsẹ ẹgbọ khi ini ogbọ o gueye itali okekhi inyọli, khi emini lọli kha kpe rọ kpaghie itali ali inyọli obọ khi Ikobani o ke khi, khi ọa mhue abi o ngme. Khi ushi ọa mu ọli ini ọa ke ririe ri emhikhoghuo na itali ali inyọli. (Emini a rọ somhi Ẹshinẹgba opfa se, áá lui Ikobani).

¹³ Eri a ri osesẹ ona a shishi ungmehi oyi Ẹshinẹgba eke a. A gbo mhọli emhi elese eghoghọ ebubu ni a gbolo ẹ riẹ.”

Emini e ri ogbọ khi oni ọa pfuase

(iMat 15.10-20)

¹⁴ Ijesu o gbo lu eni ebubu ẹgbọ gbili, oọ wẹ, “A ku esọ a shi mhe o, ni ona o lo ẹ esọ.

¹⁵ Emhikhoghuo ọa la o ni ogbọ le, ni o ri ogbọ khi ọna umha pfuase. Se ni emini o rọte ogbọ ekelemhi lasẹle, o ri ogbọ o khi oni ọa pfuase odalo oyi Ẹshinẹgba.”

¹⁶ [Oni o mhọli esọ, o rọ suo.]

¹⁷ Abi ijesu o rọ pfi eni ebubu ẹgbọ shi agho ni o rọ ya lo owa se, eniyẹ odukhokho eyọli e bhale deba li, e mhila li emini oni ungmehi o ngme.

* **7:7** Li zẹ Aza 29.13 † **7:10** Li zẹ Okiali 20.12; iDeut 5.16; Okiali 21.17; iLev 20.9

18 Ọ mhila wẹ, “Aa kie leşẹ udi emini mhia ngme? Ọa kie lo ẹ esọ khi emhikhoghuo ni o rọte odato lo ọgbọ elemhi khi ọa ya ri ọli khi ọni ọa pfuase odalo oyi Eshinegba?”

19 Irari khi oni emhi ọa ya je ọli udu, ama eke elemhi ọọ tiemhi, o gbo rọte idiegbe ya fiẹ lase.” Eri iJesu ọ ri ona guele khi eminale ni a le nya, khi e ti.

20 IJesu ọ gbo liẹ. “Emini o rọte ọgbọ ekelemhi udu lasele, o ri ọgbọ ọ khi ọna umha-pfuase.

21 Itobọ khi rọte ekelemhi udu oyi ọgbọ, isamhi ebe e rọte ẹ lasele, enabi, itşebo, ighiatọ, ọgbọ ugbeli, okia,

22 emhi ituegbe, ọbe imumu, ikpamhika, efiala, ubogbo, iyese-egbe eva a, umha-mhọli ekpe, id-itşea.

23 Ekelemhi udu eni ingeli ena nya e rọte ẹ lasele ni e ri ọgbọ ọ khi ọna umha-pfuase odalo oyi Eshinegba.”

*Imiesuọ oyi ọkpotso ọghuo
(iMat 15.21-28)*

24 Ighọ iJesu ọ rọte aghọ vu, ọ je ukiẹkie eke iTai. Ọ lo owa oghuo, ọa nono ni ọgbokhoghuo ọ leşẹ khi ọli la akaghọ. Ama ọa dobe ri egbe ọli sheli.

25 Abi ọkpotso ọghuo ni ayemhe ebe o la omi ọli ọni ọmueshi egbe, ọ rọ suọ eko iJesu, ọ nyanya bhale ya de wugha li odalo.

26 Ọngi iJeta ọni ọkpotso ọ khi, a bia li shi eke iFonisha ni o la iSiria. Ọ lema iJesu ọ khu oni ayemhe ebe omi ọli egbe a.

27 IJesu ọ́ọ́ li, “Zẹ ni eniyẹ e kpẹ le eminale ne, ọa ti ni eminale ni a kha rọ na eniyẹ le, ni a pfi ọli ghi ewa.”

28 Oni ọkpotoso ọ́ọ́, “Guẹguẹguẹ Onomhue! Ama ewa e kiele la ifui itebu ẹ sanọ eminale ni eniyẹ kẹşẹ le le.”

29 IJesu ọ́ọ́ ọli, “Itobọ oni ungmehi ni u rọ sọ mhe ọ ena, ke je, u ya bhale ya ẹ khi oni ayemhe ebe, o she rọte omi ẹ egbe ya lase.”

30 Ighọ, ọli je apfe, ọ ya ẹ khi omi ọli o yeshi ukpho khi oni ayemhe ebe o she rọte ọli egbe vu.

Ijesu ọ ri ungmehi ni ọ gbo lesọ ze

31 Ighọ iJesu ọ rọte ukiẹkiẹ obini iTai vu, ọ rọte iSidoni ya tiemhi okẹ iGalili, ọ je ekẹ iDikapolisi

32 Oobọ ẹgbọ eghuo e la tsua omọse oghuo ni ọ khi ọlesọ, ni ọ gbo khi ungmehi, bhale ghi iJesu. E lema li ọ kpẹkpẹ ọ lẹşẹ ri obọ nga li egbe.

33 Ighọ iJesu ọ rue lẹlighuo fiẹ iteva oyi eni ebubu ẹgbọ, ọ ri imiesabọ shi oni omọse esọ, ọ to etẹ, ọ ri obọ ti oni omọse ẹlẹmhi.

34 Ighọ iJesu ọ bino idane, ọ tu ekperumhe-a, ọ́ọ́ oni omọse “Efata!” Emini a ri ona ngme khi, “Khueghie-a!”

35 Utoghuo kpe esọ eyi oni omọse e khueghie a, ẹlẹmhi oyọli o taghie-a, ọ ngme lasele gboo.

36 Ighọ iJesu ọ tse agua ye wẹ e khi gueye ọgbokhoghuo. Ama abi ọ dobe tse agua ye wẹ kpa, ighọ e dobe ngme oni ingme.

37 O ri abọ sha ẹgbọ eni e suọ nya. E liẹ, “Ọ ma gue rieleş emhikpa,” e gbo liẹ, “Ọ ri eni e le esọ ọ suọ esọ, ọ khueghie ingmenu unu a, ẹş ngme.”

8

*Ijesu ọ ri eminale na ẹgbọ agbẹlẹ asha ene le
(iMat 15.32-39)*

¹ Ọa rọte aghọ tẹsẹ ni ebubu ẹgbọ elese e rọ legba. Abi eni ẹgbọ ẹa rọ mẹ emhi le, ijesu ọ lu eniyẹ odukhokho eyọli, ọ́ọ wẹ,

² “Elemhi ẹgbọ ena ẹẹ ala mhe, ò she gba ẹlẹ esẹ ni e te nu mhe la ana ni ẹa te mẹ emhikhoghuo le.

³ Ini mhiẹ e ri okiamhi ke je apfẹ mena, ubi o ya rue wẹ shi ode, itobọ khi eghuo ọ, e rọte odonue bhale.”

⁴ Eniyẹ odukhokho eyọli e mhila li, “Obo u sa khi a te ya mẹ eminale ni e bu ifu ọdagbe ona, ni e ya khuese ẹgbọ ena nya?”

⁵ Ijesu ọ mhila wẹ, “Ibulẹdi ingmẹ a mhọli?”

E ọli “Ishilua.”

⁶ Ọ gueyẹ eni ebubu ẹgbọ e shitọ eke. Ighọ ọ rue eni ibulẹdi ishilua eghọ, ọ kphemhi na Ẹshinegba, ọ khi wẹ-a, ọ rue wẹ na eniyẹ odukhokho eyọli e ke kemhi wẹ na eni ẹgbọ. Ighọ eniyẹ odukhokho eyọli e li kemhi na wẹ.

⁷ E gbo mhọli ikuku imi ifẹlẹ shi aghọ. Ọ gbo kphemhi na Ẹshinegba shi ọ. Ọ rẹwẹ na eniyẹ odukhokho eyọli e gbo li kemhi wẹ.

⁸ Eni ẹgbọ e le, e khue. E le se, eni eniyẹ odukhokho e sanọ iku wẹ ni e le kpọle vọ ighughu ishilua.

⁹ Ẹgbọ agbẹlẹ asha ene e khi. Ijesu ọọ eni ẹgbọ e ke je.

¹⁰ Lọli ali eniyẹ odukhokho eyọli e lo ọkọ-oke oniẹmhi e je ukiẹkiẹ obini iDalamanuta.

Egbo iFarisi e mhila irøkhasẹ
(iMat 12.38-42; 16.1-4)

11 Egbo iFarisi e bhale, e mhila iJesu ogbo ni e ro mu oli fe. Eẹ oli o ri irøkhasẹ ni o rote iloghie bhale khasẹ ewẹ ni wewẹ e leşẹ khi Eshinegba o ghie oli.*

12 IJesu o tu ekperumhe-a, ođo, “Elo o ze ni eẹ egbo a ro mhila irøkhasẹ onyaloa? Abi o li mhi li gue oli e ye e khi, aa ya me irøkhasẹ onyaloa okhoghuo.”†

13 Igho o pfi we shi agho vu, o nyene egbe ukhokho gbo ya lo oko-okẹ oniemi, o da je ukiekie obinuzeva.

Oyese oyi iFarisi ali Erọdu ni o li abi ifuma
(iMat 16.5-12)

14 Eniye odukhokho eyoli ea sato tsua ibuledi ni e bu, se ni uruli oghuo ni e mhuẹ shi oni oko-okẹ oniemi.

15 IJesu o tse agua ye we, ođo we, “A mhuẹ egbhe shi ifuma eyi iFarisi ali Erọdu.”‡

16 Eniye odukhokho eyoli e nu egbewe ngme, e lie, “Itobo khi awa a mhuẹ ibuledi o ro ngme ona.”

17 IJesu o leşẹ emini e ngme. O mhila we, “Elo o ze ni a ro gue ezọ khi aa mhọli ibuledi? Eri aa ya me eke abi khi eri o a kie lo e esọ? Eri udu oyeẹ o na khukhu?”

18 A mhọli alo, aa rewe a me eke? A gbo mhuẹ esọ aa rewe e suọ? Aa sato?§

19 Abi mhi ro kholo ibuledi ishe-a na egbo agbele asha ishe, ighughu ingme a sanọ iku we eke vọ?” Eẹ oli, “Igbeva!”

* 8:11 Li ze iMat 12.38; iLuk 11.16 † 8:12 Li ze iMat 12.39; iLuk 11.29 ‡ 8:15 Li ze iLuk 12.1 § 8:18 Li ze ijere 5.21; Ezik 12.2; iMak 4.12

20 “Abi mhi rọ gbo kemhi ibuleđi ishilua na ẹgbọ agbẹlẹ asha ene, ighughu ingme a sanọ iku wẹ vọ?”

Ẹ ọli “Ishilua.”

21 Oọ, “Eri emini mhia ngme ọa kie lo ẹ esọ?”

Ijesu ọ la obini iBẹtisaida khueghie ọzalo alo a

22 E bhale iBẹtisaida. Ẹgbọ eghuo e tsua ọmọse ọzalo bhale ghi iJesu, Ẹ ọli ọ kpẹkpe ọ ri obọ ti ọli.

23 Ighọ iJesu ọ mu ọni ọmọse ọzalo obọ-obọ ya fiẹ ifui oni apfe. Ọ to etẹ shi obọ rọ shishi ọli alo-a. Ijesu ọ mhila li ini ọ me emhikhoghuo.

24 Ọni ọmọse ọ bino idane, ọọ “Mhia me ẹgbọ khi e li abi ẹera a kia gase.”

25 Ighọ iJesu ọ gbo ri abọ shi ọni ọmọse alo. Alo eyọli e tigbe khueghie-a, ọ me eke gboo.

26 Ijesu ọọ ke je, ọ ọli, “Khi gbo je elemhi ifui ẹli.”

IPita ọ guele oni iJesu ọ khi

(iMat 16.13-20; iLuk 9.18-21)

27 Ighọ iJesu ali eniyẹ odukhokho eyọli e vu je ikuku ẹli ni e la gase iSizeria iFilipi. Abi e li le, ọ mhila wẹ, “Oghuo ẹgbọ e famhi ẹ liẹ khi mhi khi?”

28 Ẹ ọli, “Eri eghuo ẹ khi iJoni ni ọọ batazi ẹgbọ u khi; eghuo ẹ khi Elaja u khi; elese ẹ khi ọtuoghuo emekeguele na ẹle u khi.”*

29 Ọ ke mhila wẹ, “Ama, oghuo ẹẹ oyeẹ a liẹ khi mhi khi?”†

IPita ọ sọ li ọ, ọọ li, “Yeyẹ u khi iKirisiti ni ọ khi Ọmiepfuese?”

30 Ijesu ọ tse agua ye wẹ e khi gueye ọgbokhoghuo ọni lọli khi.

* 8:28 Li zẹ iMak 6.14-15; iLuk 9.7-8 † 8:29 Li zẹ iJon 6.68-69

*Ijesu o guele shi eke khi loli ya ghua
(iMat 16.21-28; iLuk 9.22-27)*

³¹ Igho o sese eniye odukhokho eyoli khi Omi Ogbọ o mema ya me osoli egbegbo. Eni egbhali, ali ighie eyi ekpodalo-ugamhi ali eni e sese ishi, e ya kie oli. A ya gbe loli-a, ama ele onuzi-esese, o gbo ya guale.

³² O ngme ona lasele gboo. Igho iPita o lu oli ochi, oo li o khi ke ngme ungmehi onana ghue.

³³ Ama abi ijesu o ro nyene alo ukhokho bino eniye odukhokho eyoli, o dese iPita. Oo li, “Vu mhe odalo le yeye Okphaghiye. Wa mholi ingme Eshinegba shi udu, ama emhi agbo.”

³⁴ Igho o lu eni ebubu egbo ali eniye odukhokho eyoli, oo we, “Ini ogbokhoghuo oo nono ni loli bhale deba mhe, o mema ya kie egboli, o rue apfida oyoli, oo deba mhe.‡

³⁵ Itobo khi onini o da dua ni loli tsumhi agbo oyoli ne, o ya de oli obo a, ama oni o da ri irari oyemhe ali irari oyi usomhi onete oyi Eshinegba rue agbo oyoli pfiya, o ya tsumhi oli. §

³⁶ Eleli onoghwo ogbo o ya me ini o mholi agbo nya khi ayemhe oyoli o li opfu-a?

³⁷ Elo ogbo o ya ro ogghie ayemhe oyoli?

³⁸ Ini omama oyemhe ali omama oyi ingme oyemhe o da mu ogbokhoghuo elemhi agbo ichimhi ali agbo okholo ona ne, omama oyi onogbo o ya li mu Omi Ogbọ elegho ini o bhale elemhi ufumhi oyi Itali ali oyi igeni ni e pfuase.”

‡ **8:34** Li ze iMat 10.38; iLuk 14.27 § **8:35** Li ze iMat 10.39; iLuk 17.33; iJon 12.25

9

¹ O gbolo ẹ wẹ, “Mhi gue igesikia yẹ ẹ khi, ẹgbọ eghuo e migha ana, ni ẹa ya ghu ne, ni e rọ mẹ khi Eghiele oyi Ẹshinẹgba o bhale, elemhi ekpabọ.”

Imamachi oyi iJesu
(iMat 17.1-13; iLuk 9.28-36)

² Abi ẹlẹ-esesa e rọ dọsẹ, iJesu o rue iPita, ali ijemhisi ali iJoni, ya nga ute oniẹmhi ni o yagha, asha ni wẹwẹghuo kpe e la. Ighọ e mẹ khi iJesu o mu melaa.

³ Itsua ni o rọ so, e pfuase-a, e gẹ pẹpẹpẹ. E tode pfuase dọsẹ utsakolo, e dọsẹ abi ọgbọkhoghuo ọa tigbe dobe ya li pfue wẹ-a pfuase ramhi agbọ ona.

⁴ Ighọ eni eniye odukhokho aase eyọli e mẹ khi Elaja ali iMosisi e lasele nu iJesu gheta.

⁵ IPita ọọ iJesu, “Oseṣe, o guṣe ti khi awa la akana. Zobe ni anye to ikholo ese shi ana. Oghuo o o kha khi oye, oghuo o khi oyi iMosisi, onokpọle o khi oyi Elaja.”

⁶ Oa ke leṣe emini o ke ya ngme, itobo khi eri lolu ali enekpọle e yila dọsẹ.

⁷ Ighọ otughunu o lasele ya guese wẹ-a, Ẹshinẹgba o rọte elemhi oni otughunu ngme, ọọ, “Ominhe ni Omoṣe na, ni mhi nono ingme oyọli egbegbo. A ke suọ eso na li.”*†

⁸ Utoghuokpe khi e ke pfi alo bino, ẹa ke mẹ ọgbọkhoghuo sẹ ni iJesu lolighuo.

⁹ Abi e li rọte oni ukhomhi ute e tiemhi le, iJesu o gueye wẹ e khi gueye ọgbọkhoghuo emini e mẹ ini Omi Ogbọ ọa li rọte eghuli guale.

* 9:7 Li zẹ iMat 3.17; iMak 1.11; iLuk 3.22 † 9:7 Li zẹ iPit 1.17-18

10 E ri oni ungmehi gbe akanya, ama e nu egbewe gheta emini irote eghuli guale o ngme.

11 Igho e mhila iJesu, “Elo o ze ni eni e sese e ro lie khi Elaja o kpe ya bhale?”‡

12 IJesu oo, “Egbegbo lo khi Elaja o kpe ya bhale, o ya bhale ya mu egbe emhi nya shi eke. Elo o mema ze ni Ebe-no-pfuase o roo khi Omi Ogb o mema me osue egbegbo, a gbo kie oli?”

13 Ama a ghe i, Elaja o she bhale, e ri ele emini o ghole we deba li ezeze abi a li keke ingme oyoli shi Ebe-no-pfuase.

*Iroze oyi ozo no mhu ayemhe obe
(iMat 17.14-21; iLuk 9.37-43)*

14 Abi e ke ro ya kugbe eniye odukhokho ni e kpole o, e me khi ebubu egbo o le gaso we, esese Ishi eyi iMosisi e nu we la akagho khako.

15 Abi eni egbo e lese me iJesu te, abo e sha we egbegbo. E na ya tse oli.

16 O mhila we, “Elo o khi ni a nu we khako o shi?”

17 Omose oghuo o rote elemhi eni ebubu egbo ya rue unu, oo, “Osese, omimhe oni omose mhi ro bhale ghi e, ayemhe obe o nase oli, ni oa ke ze oli e ngme.

18 Ini oni ughuamhi o da tsua rughu oli ne, eri o pfi oli e gbe, oo chi ofulu unu, oo le ako unu, o zese a. Mhi gueye eniye odukhokho eye e khu oli oni ayemhe egbe-a, ama ea dobe.”

19 IJesu oo, “Ee egbo ni ea mholi irudunga ena, ele-ingme mhi ke mholi ro nu e ya la akana, ele-ingme mhi beshi ya la onana ramhi, Mu oni om o ghi mhe!”

‡ 9:11 Li ze iMala 4.5; iMat 11.14

20 Igho e mu oni omọ bhale. Abi oni ayemhe o ro me ijesu tee, o de rughu oni omọ, o pfi oni omọ gbe, oo kpi abo ali awe-a, oo wu oli eke, oo chi ofulu unu.

21 Ijesu o mhila ita oni omọ, “Aele o te lina?”

Oo, “Abi o te khi omọ.”

22 “O she lina mu oli pfi lo elemhi erali ali elemhi oke itingmingme abi o kha gbe oli-a. Ini u mholi emini u dobe ya riele, kpekpe le elemhi anye ni u kpaghie anye obo.”

23 Ijesu oo, “Eri u we ini mhi dobe? Emhikpa oo tse na oni o da mholi irudunga.”

24 Aghoaghọ ita oni omọ o nyanya lie, “Mhi miesuo ukuku, kpaghie mhe obo ni mhi gbo miesuo shi o egbegbo.”

25 Abi ijesu o ro me khi eni ebubu egbo e na bhale ashini oni ingme o de shi, o tse se ku oni ayemhe obe. “Yeye ayemhe ungmene ali ileso, rote oli egbe ya lasele, khi gbo nyene egbe bhale o ghue.”

26 Oni ayemhe o tse se, ri itoto nighise oni omọ, o rote oli egbe ya fie. Oni omọ o ke li abi oni ghua. Egbo e lie, “O she ghua.”

27 Ama, ijesu o mu oni omọ obo vule migha. O migha.

28 Abi ijesu o ro lo elemhi owa se, eniye odukhokho eyoli e bena mhila li, “Elo o ze ni anye aa ro dobe khu oli oni ayemhe egbe-a?”

29 Ijesu o so we o, oo we, “Iromhi isoso ali azumhi tse o dobe a khu onana.”

*Ijesu o gbo ngme ingme eghuli oyoli
(iMat 17.22-23; iLuk 9.43-45)*

³⁰ IJesu ali eniye odukhokho eyoli e roṭe agho vu, e roṭe iGalili doṣe, oṣa nono ni oḡbòkhòghuo o leṣe ashini wewe e la,

³¹ Itobò khi o seṣe eniye odukhokho eyoli, oṣo ye, “A ya ri Omi Oḡbò na eḡbò de. E gbe oṣi-a. Eḡe nuzi-ese o gbo guale.”

³² Ama emini o ngme oṣa lo we esò, ulishi o mu we abi e li ya mhila li emini o roṣi ngme.

Oni o fu ne nya

(iMat 18.1-5; iLuk 9.46-48)

³³ E bhale eṣi iKapanomu. Abi o ro la elemhi owa, o mhila we, “Eḡo a khako shi amo abi a ro la ode?”

³⁴ Ama e tsaghiye-a, itobò khi oni o kpeda nya elemhi we e la ode khako shi. §

³⁵ IJesu o shito, o lu eniye odukhokho oḡbava eyoli, oṣo we, “Ini oḡbòkhòghuo oṣo nono ni loṣi khi oni odode, o kpe ya ri eḡbòli khi oni o kpukhokho nya, ali oni o ga eḡbò nya.”*

³⁶ O mu ukuku oṣo vule migha we iteva. O mu oṣi shi abo, oṣo we,

³⁷ “Onini o ri itobò oyemhe mie oṣuoghuo ikuku eniye enana ne, mhemhe o mie. Onini o da mie mhe ne, oni o ghie mhe o mie, oṣa khi mhemhe.”†

Oni oṣa da khi oḡbe awa ne oyi awa o khi

(iLuk 9.49-50)

³⁸ Iḡoni oṣo, “Oseṣe, anye me oṣose oḡhuo ni o ri eva oye khu ayemhe ebe kua. Ama anye gueye oṣi o khi gbo ligho, itobò khi oṣa khi oḡhuo elemhi awa.”

§ 9:34 Li ze iLuk 22.24 * 9:35 Li ze iMat 20.26-27; 23.11; iMak 10.43-44; iLuk 22.26 † 9:37 Li ze iMat 10.40; iLuk 10.16; iḡon 13.20

39 Ijesu o wẹ, “A khi ke khu o li o, itobo khi oni o ri eva oyemhe gbe akanya onyaloa, o a tigbe e vule ke ngme onobe oyemhe.

40 Itobo khi oni o a khi obe awa, oyawa o khi.”‡

41 Abi o li mhi li gue o li e ye e khi, onini o da die uko amẹ na e da irari eva oyemhe ne, ali irari khi onayi iKirisiti a khi, o ya me eleli o. §

*A mu egbe e shi emini e yese ogbo o lamhe
(iMat 18.6-9; iLuk 17.1-2)*

42 “Ini ogbokhoghuo o yese ikuku eniye enana ni e mie mhe suo lamhe, o bie tine ni a ge eche iko oniemhi shi ogbo oghoghọ uruli tsua pfilo elemhi oke oniemhi.

43 Ini obo oye o re ya lamhe, khi o li pfi. O ti e egbe ne ini u waa mhọli obo ya lo iloghie na agboagbo, ni u ro tsua abo eve-eva eye ya lo ilimhi iriere, ashini erali e a tigbe e pfo-a ghue.*

44 [Akaghọ ikpatsọ ni e le we ni e a tigbe e ghu e la, ali ashini erali ni e tose we-a, e a tigbe e pfu ghue.]

45 Ini owe oye o re ya lamhe, khi o li pfi, o ti e egbe ne ini u waa mhọli awe ro lo iloghie na agboagbo ni u ro mhọli awe eve-eva, ni u ro ya lo ilimhi iriere.

46 Akaghọ ikpatsọ ni e le we ni e a tigbe e ghu e la, ali ashini erali ni e tose we-a, e a tigbe e pfu ghue.

47 Ini ukpeloe oye o re e lamhe, vuonyo li pfi, o ti e egbe ne ini u ri ukpeloe oghuo lo Eghiele oyi Eshinegba, ocho ni u ro ya mhọli ikpamhi alo eva, a pfi e ya lo ilimhi iriere.†

48 Akaghọ,

‡ 9:40 Li ze iMat 12.30; iLuk 11.23 § 9:41 Li ze iMat 10.42

* 9:43 Li ze iMat 5.30 † 9:47 Li ze iMat 5.29

“Ikpatsọ ni ẹ le wẹ
ni ẹa tigbe ẹ ghu e la,
ali ashini erali ni ẹ tose wẹ-a,
ẹa tigbe ẹ pfu ghue.”‡

49 “Erali a rọ nye ọgbọgbọ-a, a rọli khi ọni ọ pfuase
abi a li ri ugbheli ẹ ri iluasobo khi pfuase.

50 “Ugbheli o ma ti, ama ini oviọlọ oyọli o kala, se
o ke li ze gbolo rọ ya mele ugbheli-a?

“A ze ni a mhọli ugbheli shi agbọ oye ẹ. A nu egbe
ke ngeli angeli opfomhe.”§

10

Ijesu ọ ngme shi ingme ipfughue-a
(iMat 19.1-12; iLuk 16.18)

1 Ijesu ọ rọte aghọ vu je eke iJudia, ini a da
iJodani. Ighọ ẹgbọ ni e bu e gbo ve ngale deba li,
ọ sese wẹ abi ọ kpẹ li.

2 Ẹgbọ iFarisi eghuo e bhale ya mu ọli fe, e mhila
li, “Ushi oyawa o lama, ọmose ọ khu ughue oyọli?”

3 Ọọ, “Elo iMosisi ọ gueye ẹ a ke li?”

4 E ke, “Eri iMosisi ọ lama ọmose ọ keke ebe ni a
rọ pfa ughue-a mhọli ughue ọli obọ, ọ khu ọli.”*

5 Ijesu ọọ wẹ, “Itobọ khi udu oye ẹ ọọ gbe, iMosisi
ọ rọ lighọ keke oni ushi na ẹ.

6 ‘Ama ọmose ali ọkpotoso, Ẹshinegba ọ rọte ig-
baekele agbọ ma wẹ.’†

7 ‘Onana o ze ni ọmose ọ rọ ọ pfi itali ali inyọli shi
eke, ọ ya toma ughue ọli ọ.

‡ 9:48 Li ze Aza 66.24 § 9:50 Li ze iMat 5.13; iLuk 14.34-35

* 10:4 Li ze iDeut 24.1-4; iMat 5.31 † 10:6 Li ze Igbae 1.27; 5.2

⁸ Wẹwẹ aava e mele idiegbe ọghuo a.' Eghẹghẹ aghọ ẹa ke khi etuava, ama ọghuo.‡

⁹ Irarighọ, emini Eshinẹgba ọ da toma ne, ọgbọkhọghuo ọ khi vase wẹ a."

¹⁰ Abi e rọ gbo la elemhi owa, eniyẹ odukhokho eyi iJesu e mhila li ọgbọ ona.

¹¹ IJesu ọọ wẹ, "Ọnini ọ da khu ughuẹ ọli ni ọ ya rue ọkpotoso ọlese ne, eri ọ kia okia shi oni ughuẹ ọli ọ.

¹² Ini ọni ọkpotoso ọ lase ayi ọdọli le khi ọ ya ngeli na ọmọse ọlese, eri ọ kia okia."§

Ijesu ali eniyẹ enikeke

(iMat 19.13-15; iLuk 18.15-17)

¹³ Egbọ eghuo e mu eniyẹ bhale deba iJesu ni ọ ri obọ ti wẹ, ama eniyẹ odukhokho eyọli ee khu wẹ.

¹⁴ Abi iJesu ọ rọ mẹ ghọ, o ri elemhi bi ọli. Ọọ wẹ, "A zẹ ni ikuku eniyẹ e bhale deba mhe. A khi ke khu wẹ, itobọ khi enabi wẹwẹ e li mhọli obọ shi Eghiele oyi Eshinẹgba.

¹⁵ Zẹ mhe gue igesikia ye ẹ khi ọni ọa da rue Eghiele oyi Eshinẹgba abi eniyẹ enikeke ne, ọa tigbe ya lo iloghie."*

¹⁶ Ọ muno eniyẹ shi egbe, ọ ri obọ nga wẹ ukhomhi, ọ sọ iromhi na wẹ.

Ozele-omose ni ọ lolo pfue

(iMat 19.16-30; iLuk 18.18-30)

¹⁷ Abi iJesu ọ ke rue okiali eke khi ọ vu, ọmose ọghuo ọ na bhale ya wugha li odalo, ọọ li, "Ọsẹsẹ nete! Elo mhi ya riẹlẹ ni mhi rọ ya mhue agbọ na agbọagbọ?"

‡ **10:8** Li zẹ Igbae 2.24 § **10:12** Li zẹ iMat 5.32; 1 iKọri 7.10-11

* **10:15** Li zẹ iMat 18.3

18 IJesu o li, “Elo e ze ni u ro o lu mhe onoti. Ogbokhoghuo o la o ni o ti, se ni Eshinegba.”

19 Ni mhi ro so e ogbo ni u mhila mhe, u lese ushi ni Eshinegba o ro shi eke. Ni o le, ‘A khi gbe ugbeli, a khi kia okia, a khi do ughiatu, a khi pfi otsela egbho mu ogbo, a khi li ogbo le, mu ekpe na ita e ali inye e.’ †

20 Oni oze o o, “Ose se, abi a te bia mhe mhi te ri ena nya a gbe akanya.”

21 IJesu o ri eloe inono bino oli, o o li, “Emhi oghuo tse o kpe e le ni waa riela ne. Je ya ri emini u mholi nya de ni u kemhi we na eni ea mholi emhi, eghenge agho ni u mholi epfue shi obini iloghie, u tige bhale ya deba mhe ke kia.”

22 Abi oni omose o ro suo ona, alo eyoli e yese a, o ri iyeseudu-a ya vu, itobo khi o mholi epfue eniemhi.

23 IJesu o bino gasa kpa, o o eniye odukhokho eyoli, “O ma mu ogbo ni o pfue unu ni o ro lo Eghiele oyi Eshinegba.”

24 Ingmemhi eyoli e ri abo sha eniye odukhokho eyoli. Ama iJesu o gbolo e, “Eniye eyemhe, o ma mu eni e ri egbe da epfue oyewe unu ni e ro lo Eghiele oyi Eshinegba.”

25 Ni ogbo ni o pfue o ro lo Eghiele oyi Eshinegba, o ya munu dose, ni ogbo ke dua ni loli ri alakumi rote esa asuge ya fie.”

26 Ona o ke ri abo sha eniye odukhokho eyoli ne, e ro mhila egbe, “Oghuo o dobe ya lo o sho?”

27 IJesu o pfi ukpelo bino we, o o, “Ona o a ze ogbo ya li ama emhikpa o ze Eshinegba a li.”

† 10:19 Li ze Okiali 20.12-16; iDeut 5.16-20

28 IPita ọ̀ọ̀ iJesu, “Emhinya anye tsua kua bhale deba ẹ.”

29 IJesu ọ̀ọ̀ wẹ, egbegbi-ingme mhi gue ẹ yẹ ẹ khi ọ̀nini ọ̀ da pfi apfẹ ọ̀li shi eke, ali inyoghuo ọ̀li eni emose ali eni ikpotso, ali ita ali inyọ, ni ọ̀ pfi eniye ali ishemhi, ghe ọ̀wolọ shi eke irari oyemhe ali usomhi onete oyi Eshinegba,

30 a ya somhi ọ̀li opfa. Elemhi agbo ona, a ya khivose na li asha egbhueshe, ikhivose owa ali ikhivose inyoghuo, ali inyọ ali eniye ali ishemhi, ali anasemhe. Ọ ya mhue agbo na agboagbo, elemhi agbo ni o ke ẹ bhale.

31 Ama egbo eghuo ni e ralo, e ya kpe ukhokho. Eni e kpe ukhokho amo, e ya khi eni odode.‡

Ijesu ọ̀ gbo ngme ingme eghuli oyoli utonuzi-ese (iMat 20.17-19; iLuk 18.31-34)

32 Abi iJesu ọ̀ ro tsua wẹ le iJerusalemu, ni ọ̀ ro ralo na wẹ, eni ingme e pfuse ghagha a shi eniye odukhokho eyi iJesu udu. Ulishi o mu egbo ni e deba wẹ. Igho iJesu ọ̀ gbo li rue eniye odukhokho ogbava eyoli ye ochi, ọ̀ gueye wẹ emini loli ya me ini wewe e ramhi iJerusalemu.

33 Oo, “iJerusalemu awa je ena, a ya la oobo rue Omi ogbo na ighie eyi ekpodalo-ugamhi ali eni ẹ sese ishi de, a ri ọ̀li na wẹ mu. E pfa ezọ igbe-a mu ọ̀li, e ghi ọ̀li abo ghi egbo iJeta.

34 E ya roli ke li egia, e tono ete ku ọ̀li, e gbe ọ̀li ite, e tigbe gbe ọ̀li-a. Ama ele nuzi-ese, ọ̀ ya rote eghuli guale.”

Emini ijemhisi ali iJoni e mhila iJesu ọ̀ riele na ewe (iMat 20.20-28)

‡ 10:31 Li ze iMat 20.16; iLuk 13.30

35 Igho iJemhisi ali iJoni imi iZebedi e bhale deba iJesu, e oli, “Osese, anye e nono ni u rieḷe emini anye ya mhile ena na anye.”

36 IJesu oḷo we, “Elo a nono ni mhi rieḷe na e?”

37 E ke, anye e nono, ini u da shito ukpekhomhi oye obini Eghiele oniemi oye ne, ni u ze ni otuoghwo anye o kha shito e ukiekie obita, onokpole o shito e obogobo.

38 IJesu oḷo we, “Aa lese emini aa mhila. Uko ni mhi rote da, a dobe ya rote o da, abi khi eri a dobe ya mie ibatizi onabi mhi mie?”§

39 E ke, “Anye ya dobe.” IJesu oḷo we, “A dobe ri uko ni mhi ro da ya da, a gbo dobe mie ibatizi onabi mhi mie,

40 ama mhia mholi afu ni a ro ri ogbo o shito mama mhe ukiekie obita ali obogobo ukpekhomhi oghie obini iloghie. Eshinegba o ri asha eghogho ya na egbo ni o re we shi agho khe.”

41 Abi eniye odukhokho etuogbe enekpole e ro suo ingmemhi ena, e nu iJemhisi ali iJoni i wola shi o.

42 Igho iJesu o lu we tigbili, oḷo we, “A lese khi eni e lu egbewe ighie eyi egbo eni ea ya ga Eshinegba, khi eri e li we abi o ghole we, igho eni e kpeda omhese e li e mhese na we.

43 Ama, a khi li abi wewe. Ama onini o nono ni loli khi oniemi elemhi e, o khi oni o ga ee nya.*

44 Onini o nono ni loli khi onodode, oḷo mema kpe ri egboli khi oghumha oyi egbo kpa.†

§ 10:38 Li ze iLuk 12.50 * 10:43 Li ze iLuk 22.25-26 † 10:44 Li ze iMat 23.11; iMak 9.35; iLuk 22.26

⁴⁵ Itobọ khi Omi Ogbo ọa bhale ni a ke ga li, ama eri ọ bhale ya ga ali ni ọ gbo ri agbo oyọli bhale ni a rọ luase obo na ebubu egbo.”

*Ijesu ọ ri iBatimeusi ọtase-alo-a ze
(iMat 20.29-34; iLuk 18.35-43)*

⁴⁶ Igho e bhale iJeriko. Abi iJesu ali eniye odukhokho eyọli ali ebubu egbo ni e deba li, e rọ rọte oni ọli vu, ọmose ọghuo ni ọ tase alo-a na lui iBatimeusi (omi iTimeusi a ri iBatimeusi ngme) ọ shito epfe ode mhila omhila.

⁴⁷ Abi ọ rọ suọ khi iJesu ọna iNazareti lo, ọọ tseşe leghe, ọọ lie, “Ijesu omi iDefidi, kpekpẹ, le elemhi mhe.”

⁴⁸ Ebubu egbo e tseşe ku ọli, e ọli ọ ze ni a suọ esọ. Ama eena ọ mema lolo pfi okokokhue lu ọli ne, “Omi iDefidi le elemhi mhe!”

⁴⁹ Ijesu ọ migha, ọọ, “A lu ọli na mhe.” Igho e lu oni ọtasalo-a, e ọli, “Ke ghele, vule, khi ọọ lu e.”

⁵⁰ Ọ rue awulu nọ ọ sọ pfi a, ọ ti vule pia bhale deba iJesu.

⁵¹ Ijesu ọ mhila li, “Elo wa nono ni mhi riẹle ne?”

Oni ọmose ni ọ tase alo-a, ọọ, “Ọseşe, mhia nono ni mhi gbo ke me eke.”

⁵² Ijesu ọọ, “Ke le, khi irudunga oye o she re ze.” Aghoaghọ, ọọ me eke, ọ deba iJesu rọte ode vu.

11

*Egbo e ri ufumhi na iJesu abi ọ rọ lo iJerusalemu
(iMat 21.1-11; iLuk 19.28-40; iJon 12.12-19)*

¹ Abi e rọ ti ramhi iJerusalemu ni e rọ bhale iBetifagi ali iBetani Udi Ute Olivu, iJesu ọ ghie etu-ava elemhi eniye odukhokho eyọli,

² Oọ wẹ, “A je ẹoli ni o la odalo oobọ eghọ. A kha lẹsẹ lo oni ẹoli le, a ya mẹ omi akphẹrẹ ni a muzu, ni ọgbọkhọghuo ọa nga shitọ ghue. A taghiẹ ọli bhale ana.

³ Ini ọgbọkhọghuo ọ mhila ẹ, ‘Elo o ze ni a rọ taghiẹ ọli? A gueyẹ ọli khi, Ọnọmhuẹ ọọ nono ni lọli ri ọli riẹlẹ emhi, ali khi ọ gbo rọli bhale ya shi eke lẹna.’ ”

⁴ Ighọ ee bhale ya ẹ oni ozele akphẹrẹ ni a muzu shi ifui apfẹ epfẹ ode. Abi e li taghiẹ ọli-a,

⁵ ẹgbọ eghuo ni e migha akaghọ e mhila wẹ, “Elo a la akaghọ a riẹlẹ ni a rọ taghiẹ oni omi akphẹrẹ oghọ-a?”

⁶ E sọ wẹ ọ abi iJesu ọọ e li sọ wẹ ọ. Ighọ eni ẹgbọ e ze wẹ vu.

⁷ Abi e rọ mu oni ozele akphẹrẹ bhale ghi iJesu se, e banọ ide egbe-a pfino nga oni ozele akphẹrẹ ukhokho. Ighọ, iJesu ọ nga li shitọ.

⁸ Ebubu ẹgbọ elese e li ba ide rọ ku ode, eghuo, e nyanọ eyamhi ku ode.

⁹ Ẹgbọ ni e ralo ali eni e deba li e gbe ukua, e tsẹsẹ, e liẹ,

“Okuekhoogo! Oolo!”

Ẹshinegba ọ ka khivọsẹ

na oni ọ ri eva oyi

Ọnọmhuẹ bhale!*

¹⁰ “Ẹshinegba ọ ka khivọsẹ

shi Eghiele oyi oghie iDefidi

ita awa ni ọọ bhale.”

“Ikuẹghię o khi oyi Ẹshinegba!”

¹¹ Abi iJesu ọ rọ ramhi iJerusalemu, ọ dọsẹ ya lo elemhi Owa oyi Ẹshinegba. Ọ bino emhi nya gase,

* **11:9** Li zẹ *Iwolo 118.25-26*

ama aborokhia khi obili o she bi dọse, lọli ali eniye odukhokho ogbava eyọli e je iBẹtani.

*Ijesu o pfi unu na oora okhua-eni
(iMat 21.18-19)*

¹² Ogbeakọlọ abi e li rọte ẹoli iBẹtani fiẹ, okiamhi oo gbe iJesu.

¹³ Igho ọ tapfia me ọara okhua-eni ni o guẹ ta ebe. O le ya bino ini o she mo udumhi. Abi o ro ramhi agho ọa me emhikhoghuo o, se ni ebe, itobo khi ọa ramhi eghẹghẹ ni okhua-eni e ro mo ne.

¹⁴ Igho ọọ oni okhua-eni, “Ogbokhoghuo ọa ke gbo rọte e ukhomhi ya pfa udumhi ghue.”

Eniye odukhokho eyọli e suo khi o ngme na.

*Ijesu o je Owa oyi Eshinegba
(iMat 21.12-17; iLuk 19.45-48; iJon 2.13-22)*

¹⁵ Abi e ke ro ramhi iJerusalemu, iJesu o lo Owa oyi Eshinegba, o vese eni e la akaghọ du oki kua. O kpha okphe oyi eni e pfa ikpagho ali eni e ri inekhukhu de kua.

¹⁶ Oa ze ni ogbokhoghuo o tsua itsua-oki rọte elemhi apfe oni Owa oyi Eshinegba dọse.

¹⁷ Abi o ke ro sese egbo, o ro lie, “A she kpe keke oli shi Ebe-no-pfuase khi,

“‘Owa iromhi oyi ishishi nya,
a ya ke lu Owa oyemhe,’

Ama ee, a she roli mele owa ghiato a.”†

¹⁸ Abi ighie eyi ekpodalo-ugamhi ali eni e sese ishi e ro suo ona, ee dua ode ni e te me asha ya gbe iJesu a. Ama ulishi oyi iJesu o mu we, itobo khi eri osese oyọli o ri abo sha egbo kpa.

† 11:17 Li ze Aza 56.7; iJere 7.11

19 Ogbomhi o mu eke, iJesu ali eniye odukhokho eyoli e rote oni eoli ya fi.

*Ilęsingme ni a rote okhua-eni ni o ku ebe a rue
(iMat 21.20-22)*

20 Eluzogbe oogbeakolo khi e rote oni ode dose, e me khi oni oara okhua-eni o khakha ya ramhi imhili.

21 IPita o sato, oo iJesu, "Osese, bino khe! Oara okhua-eni ni u pfi unu na o she khakha-a."

22 IJesu o so li o, oo, "Mholi irudunga na Eshinegba."

23 "Egbegbi-ingme mhi gue e ye e khi onini o gueye oni ute ona, 'Ro te akana lasele ya je elemhi oke oniemhi,' ni oara da mholi akhokhomhe shi udu shi emini o ngme ne, ni o ro mholi miesuo khi emini loli ngme o ya bhale ya tse, oo ya ligo na li.‡

24 Irarigo, emiemini u so iromhi mhila, miesuo khi u she mholi oli, oye o ke khi.

25 U kha da migha a lema, ni u ro ri ingme oyi ogbo shi elemhi, nyanya ro topfa li. Ini ite ni o la iloghie o ri olamhe eye li topfa e."

26 "Ama ini u waa da ro topfa ogboese ne, ite na iloghie oara ya li ri olamhe eye topfa e."§

*A mhila iJesu oni o ri afu na li
(iMat 21.23-27; iLuk 20.1-8)*

27 Igho ee gbo lo iJerusalemu le. Abi iJesu o li kia elemhi apfe Owa oyi Eshinegba gase, ighie eyi ekpodalo-ugamhi ali eni e sese ishi ali egbhali e bhale deba li.

‡ 11:23 Li ze iMat 17.20; 1 iKori 13.2 § 11:26 Li ze iMat 6.14-15

28 E mhila li, “Oghuo o ri afu ne ni u ro rięle eni emhi enana nya, oghuo o ri unu ne u ke rięle ena.”

29 IJesu o so we o, Oo, “Mhi ya mhila e ogbo oghuo. A so mhe o, ni mhi tigbe gueye e oni o ri afu na mhe mhi ke rięle emhi ena.

30 Oghuo o fe ri itoto na ijoni o ke batazi egbo abi egbo?”

31 Igho, e ya ye egbe ochi, e nu egbe we ngme oli khi, “Awa khe ‘Rote iloghie’ lo, o ya mhila awa, ‘Elo o ze ni aa ro mie oli suo?’

32 Ama ini awa ke, ‘Obọ oyi egbo.’ ” Ulishi oyi egbo o mu we, itobo khi ogbokpa o lese khi omekeguele ijoni o khi.

33 Igho ee iJesu, “Anye ea lese.” Igho iJesu oo we, “Mhi aa ya li gueye e oni o ri afu na mhe mhi ro ke rięle eni emhi ena.”

12

Okhe irokhokho oyi eni e ngmomhi shi ogba era ipfonu

(iMat 21.33-46; iLuk 20.9-19)

1 Igho iJesu o ke ri okhe irokhokho sese we. Oo, “Omose oghuo o ke ya gua ogba era ipfonu. O ma ugbe gase oni ogba. O to ese shi o, ni a mino ameg ikpamhi eni era kulo. O gbo to owa ni o yagha ni a la khe-ekhe shi o. Igho o ya ri oni ogba nga eghiale eghuo obo e nu loli ri ukpeloe ke khu. O vu asha obini odonue.*

2 Eghoghe ikhiese o ramhi, oni omose o ghie oghumha oyoli ghi eni o ri ogba nga obo, o le ya

* 12:1 Li ze Aza 5.1-2

mie wẹ idumhi emhi ni a kọ shi oni ogba bhale ghi lue.

³ Ama e mu ọli, e gbe ọli, e khu ọli. Ọ pfino abọ efue ya je.

⁴ Ọ gbo ghie oghumha oyọli ọlese ghi wẹ, E pfi emhi shi ọli ukhomhi, e yẹghẹ ọli-a

⁵ Ọ gbo ghie ọlese, e gbe onana-a. Ọ ghie elese ni e bu, e gbe eghuo itali, e gbolo eghuo-a.

⁶ “O kpọli ọghuo le ni ọa ghie ne, ikhi omi ọli ni ọ lolo nono ingme oyọli. Lọli ọ kpukhokho ghie. Ọ sa, ọọ, ‘E ya mu ekpe na omi mhe.’

⁷ “Ama eni e la oni ogba, eẹ egbewe. ‘Ọna ọ ya le ugu oni ogba ona, a bhale ni awa gbe ọli-a. Eghẹghẹ agho ni oni ugu o mele oyawa-a.’

⁸ Igho e mu ọli, e gbe ọli-a, e pfi ọli rote oni ogba ya lase.

⁹ “Se oni ọ mhọli oni ogba ona ọ fe ya li? Eri ọ bhale ya gbolo eni egbọ ni ọ ri oni ogba nga obọ-a, ọ rue oni ogba na egbọese.

¹⁰ Aa she zẹ ọli Ebe-no-pfuase khi.

“Eche ni itsona e kie pfi,
lọli o ke ya mele egbegbi eche
ni o ke mu ọloe ne nya-a.

¹¹ Onomhue ọ ligho riẹle ona,
óó ti anye ọloe gba’ ”†

¹² Igho egbhali eyi egbọ iJu, e nono ode ni e te ya mu iJesu, itobọ khi e lese khi wewe ọ ri oni okhe irokhokho ona nu ngme. Ama e na ulishi oyi ebubu egbọ ni e la agho, e zẹ ọli obọ, e vu.

Ingme izẹ oga na iSiza
(iMat 22.15-22; iLuk 20.20-26)

† 12:11 Li zẹ Iwolo 118.22-23

13 Igho e tigbe ya nyene egbe ya ghie iFarisi eghuo ali eniye odukhokho eyi Erodu ghi iJesu, ni e me asha rote emini o ya ngme ri ingme de oli.

14 Igho e bhale deba iJesu, e e oli, “Ose se, anye lese khi u ma ngme igesikia, khi emiemini egbo e ngme ali emiemini ogbo o khi o ya mu e eloe, ama ode oyi Eshinegba wa se se ni o te ode igesikia. Mhie i, o famhi ti abi khi o ti elemhi ushi, ni a ro ze oga na oghie iSiza?”

15 Anye ke ze, abi anye khi ze?”

Ama iJesu o she me ikpamhika oyewe. O o we, “Elo o ze ni a ro nono ni a di me mu? A rue ukpamhi anini bhale ghue ni mhi bino.”

16 E rue oghuo bhale ghi oli, o o we, “Alo ali eva eyi oghuo na ni a mu shi o ena?” E e oli, “Eyi iSiza lo.”

17 IJesu o o we, “A ri emini o khi oyi iSiza na iSiza, a ri emini o khi oyi Eshinegba na Eshinegba.”

Igho ingme oyi iJesu o sha we abo.

Ingme iteghuli-guale

(iMat 22.23-33; iLuk 20.27-40)

18 Igho egbo ena otu na lui iSadusi ni e se se khi ite-eghuli-guale o ya la ikpukhokho agbo, e bhale deba iJesu ya mhila li ogbo.‡

19 E e oli, “Ose se, iMosisi o ke ke oli shi ebe ushi na awa khi, ‘Ini omose o ghu-a pfi ughue oli shi agbo, ni o ro bia omo na li, inyoghuo oni omose o mema rue oni osamhi-olimhi ughue ni o bia eniye na oni okpotso na inyoghuo oli ni o ghu-a ogho’ S

‡ 12:18 Li ze Ika 23.8 § 12:19 Li ze iDeut 25.5

²⁰ Eḡheḡhe oghuo ó ya la ọ, a me emose oshilua ni e khi inyoghuo. Oni oḡbhali ọ rue ọkpotso. Oni omose ya ghua, ọa bia omọ na oni ọkpotso.

²¹ Inyoghuo ọli ni ọọ deba li ọ ke rue oni ọkpotso, ọ gbo ghua, ọa bia omọ. Igho o gbo li inyoghuo ọli ọnuzase.

²² Igho o gbo li khi eni inyoghuo oni omose ni e kpole nya. Eni inyoghuo oshilua nya e ga rue oni ọkpotso ughue ni ẹa bia omọ ọkhoghuo na li. Ikpukhokho ọ, oni ọkpotso ọ li ghua.

²³ Ini oḡbeḡe iguale o ramhi, ni eni e ghu-a nya e ro guale, oghuo ọ famhi ya khi ughue oni ọkpotso? Aborokhia khi wewe oshilua nya e ga rue ọli ughue egho.”

²⁴ IJesu ọ so we ọ, Ọọ, “Wa a me khi eri a da ode khi aa lese emhikhoghuo elemhi Ebe-no-pfuase, wekhi eri a lese emhikhoghuo elemhi ekpabo oyi Eshinegba.

²⁵ Ini eni e ghu-a e guale, ẹa ke ke rue ughue wekhi eri a ke re we ke ye ughue. Eri e ke li abi igeni ena iloghie.

²⁶ Ama ingme iguale oyi eni e ghua, aa she kpe ze ọli ebe ni iMosisi ọ keke ni ọ ngme ingme ebuli ni oo to shi? Abi Eshinegba ọ gueye iMosisi khi, ‘Mhemhe mhi khi Eshinegba oyi Aburaamu ali Eshinegba oyi Aziki, ali Eshinegba oyi iGiekoṣu.’*

²⁷ Eshinegba oyi eni e la agbo ọ khi, ọa khi oyi eni e ghua. Eri a ga da ode pfo nya.” Emini a ri ona ngme khi, eḡbo eni ghu-a eghuo e kie mholi agbo.

Ushi ni o fune nya

(iMat 22.34-40; iLuk 10.25-28)

* **12:26** Li ze Okiali 3.6

28 Otuoghwo eni e sese ishi, o la agho suo abi e ro khako, o me khi iJesu o ga gue so egbo iSadusi ogbo ni e mhila li, o mhila li, “Elemhi ishi nya, onoghwo o ga fune nya?”

29 IJesu o so li o, o, “Oni o mu eloe ne nya na, ‘Ku esọ-a yeye iZireni, Onomhwe Eshinegba oyawa, lolighwo kpe o khi Onomhwe.

30 Nono ingme oyi Eshinegba Onomhwe oye, ri udu oye nya ali agbo oye nya, ghe isamhi ali ekpabo eye nya nono ingme oyi Eshinegba.”†

31 Onuzi-eva ni o gbo lolo mu eloe khi, ‘Nono ingme oyi onuzava oye abi u li nono ingme egbe e. Ushi olese okhoghwo o ke la o ni o gbo mu eloe dose ena.”‡

32 Oni omose o, “U ga gue ngme, Ose. Igesikia u ngme ni u we khi Eshinegba oghwo o khi, ali khi olese o ke la o, se ni lolighwo.§

33 Ali khi awa ri udu oyi awa nya, ali isamhi eyi awa ali ekpabo eyi awa nono ingme oyi Eshinegba. Ali awa nono ingme oyi onuzava oyawa abi awa li nono ingme egbe awa. Ni awa ro ri ishi eva ena gbe akanya, o ghole Eshinegba dose ni awa ya ri iluasobo ali isomhopfa ododa bhale ghi o.”*

34 Abi iJesu o ro me ileasingme ni o ro so lue o, iJesu o o li, “Wa a ga nuata shi Eghiele oyi Eshinegba.”

Ro te agho vu ogbo okhoghwo o ke gbolo mhila li ogbo okhoghwo.†

Omi oni Omiepfuese o khi
(iMat 22.41-46; iLuk 20.41-44)

† 12:30 Li ze iDeut 6.4-5 ‡ 12:31 Li ze iLev 19.18 § 12:32 Li ze iDeut 4.35 * 12:33 Li ze Osia 6.6 † 12:34 Li ze iLuk 10.25-28

35 Abi iJesu o ro la elemhi apfe ni o la Owa oyi Eshinegba sese egbo, o mhila we ogbo. Oo, Elo o ze ni esese Ishi eyi iMosisi e ro lie khi omi iDefidi Omiepfuese o khi?

36 Abi Ayemhe-~~no~~-pfuase o ro kpha iDefidi so, o ro rote unu oyoli lie.

“ Eshinegba oo, Onomhue oyemhe.

Shito mama mhe

ramhi egheghe

ni mhi ro ya ri ebe e

shi e ufui ekoawe.’ ”‡

37 Ini iDefidi o rote unu oyi lolighuo lu oli Onomhue, se oni Onomhue oyoli o ke gbo lie khi omi oli?

Ebubu egbo e ku eso a shi eke shi emini o ngme, ni o ri egbe mu we.

Ijesu o tse agua ye eniye odukhokho eyoli shi esese Ishi eyi iMosisi egbe

(iMat 23.1-36; iLuk 20.45-47)

38 Ijesu o sese we, Oo we, “A mu egbe e shi esese Ishi eyi iMosisi egbe. Itsua na dolodolo e ma ghole we e iso ke kia ifui oki, ni egbo e ke tse we otse ekpe.

39 E ma nono ni wewe e shito ukpekhomhi ni o mu eloe elemhi owa ugamhi oyi awa ali ashini o mu eloe elemhi ilegba, ni a la le, ni a la da.

40 Itoto e ro li esamhi-olimhi e le. Iromhi ni e nue, eyi abamemhe, e so. Eshinegba, o ya na we osoli oniemi to o.”

Irona ni osamhi-olimhi o ro na Eshinegba

(iLuk 21.1-4)

41 Abi iJesu o ro shito ti mama oni akpati ni a pfi ukpagholo irona a lo elemhi Owa oyi Eshinegba, oo

‡ 12:36 Li ze Iwolo 110.1

bino ẹgbọ abi e li pfi ikpaghọ lo ọ. Ẹgbọ ni e pfue ebubu e pfi ikpokpomhi ikpaghọ lo.

⁴² Ighọ ọsamhi-olimhi ni ọa mhue emhikhoghuo, ọ li ya pfi anini eva lo.

⁴³ Ighọ iJesu ọ lu eniye odukhokho eyọli, Ọ́ọ wẹ, “Igesikia mhi gue ẹ ye ẹ, khi ọni ọsamhi-olimhi ni ọa mhọli emhikhoghuo ọna, lọli ọ ri irọna ni o fune nya bhale doṣe ẹgbọ enekpọle nya

⁴⁴ Itobọ khi eri eni e pfue e rọte ẹpfue ni e mhue mu ẹpfiẹ rọ riẹlẹ irọna. Ama ọni ọsamhi-olimhi ọna, rọte elemhi umhame oyọli, ọ kie rue emini ọ mhọli nya ni ọ kha rọ ke le, riẹlẹ irọna.”

13

*Ijesu ọ guele emini a ya ke me ikpukhokho agbo
(iMat 24.1-2; iLuk 21.5-6)*

¹ Abi iJesu ọ rọte elemhi Owa oyi Ẹshinẹgba fiẹ lasele tee, ọmọ odukhokho oyọli oghuo, ọ́ọ li, “Bino ghue, Ọṣeṣe! Ghe abi ukpokpomhi owa ona ali eche ni a rọ ma li e li somhi otse khe!”

² Ijesu ọ sọ li ọ, ọ́ọ, “Wa me ukpokpomhi owa ona. Ẹghẹghẹ o ya bhale ni echele okhoghuo ọa ke rọ ya migha ukhomhi okhoghuo. Wẹwẹ nya e ya de kua.”

*Ozughu ali Imu-okhọli vule
(iMat 24.3-14; iLuk 21.7-19)*

³ Abi iJesu ọ li shito ukhomhi Ute ẹẹra Olivu, ni o sọ alo ghue oni Owa oyi Ẹshinẹgba, iPita ali iJemhisi ali iJoni ali Aduru e bẹna bhale ya mhila li,

⁴ Ẹ ọli, “Gueye anye, ẹghẹghẹ ni a rọ ya ke me eni ingme enana. Elo a ya ke me ni a rọ ya leṣe khi

oni egheghe ni eni emhi ena e ro ya tse khi o she ramhi?”

⁵ Igho iJesu o o we, “A kuegbe-a ke tokpe, ini ogbokhoghuo o khi di e.

⁶ Ebubu egbo e ya ri eva oyemhe bhale deba e, e lie khi, ‘Mhemhe mhi khi loli,’ ee di ebubu egbo.

⁷ Ini a suo khi a kholi, o ke khi eri a suo eko ingme okholi obini odonu, a khi ze ni o nighise e udu. Emhi eghogho e mema bhale ya tse, ama ukpese agbo o kie ramhi.

⁸ Ishishi ali ishishi e ya mu okholi vule shi egbe o, eghiele ali eghiele e ya li mu okholi vule shi egbe we o. Eke o ya la asha kpa ke nighise, ee kulue. Okiamhi oniemi o o pfi. Igbaekele osoli na abi o o li okpotso ni oku o lese bele e to egbe.

⁹ “A ri ukpeloe shi eke lolo ke tokpe. A ya mu e je owa ni a la gue ezoo. A la elemhi Owa ugamhi gbe e. A ya ri itobo oyemhe mu e bhale odalo oyi enighie ali eni e mheshe ni a ro gue usomhi onete oyi Eshinegba ye we.

¹⁰ Ama neni ukpese agbo o ya ramhi, a mema she ya tse abo oni usomhi onete oyi Eshinegba ye egbo na ishishi nya.

¹¹ Ini a da mu e bhale khi a re e gue ezoo, khi ze ni udu o nase e shi emini u ya ngme. Ama lese ngme emiemini Eshinegba o ya ro ne oni egheghe agho, itobo khi o khi yeye wa ngme, ama Ayemhe-no-pfuase.*

¹² “Egbo e ya ri inyoghuo we bhale na gbolo-a, ita e li ri imi we li bhale ni a li gbolo-a. Eghoghe agho,

* **13:11** Li ze *iMat 10.17-20; iLuk 12.11-12*

eniye e ya ke so alo okholi ghue eni e bia we o, e gbolo we-a.

¹³ Egbọ nya e ya ri itobọ oyemhẹ ke biselemhi ẹ, ama ọni ọ ri egbe mie ya ramhi ukpese, a ya mie pfuese.†

Emhi obe ni ọọ vese egbo kua

(iMat 24.15-28; iLuk 21.20-24)

¹⁴ “Ama, a kha da me emini ẹ pfi oyese, ashini aa kha me ọli, ikhi oni ọ vese egbo kua, egheghe agho ọni ọ ze ebe ọ lese abi a ri emini ọ ze ngme. Eni e la eke iJudia e na nga ikhomhi ite.‡

¹⁵ Ọni ọ la ukhomhi owa ne ọ khi tiemhile elemhi owa ya rue emhikhoghuo.

¹⁶ Ọni ọ la ifui ishemhi ọ khi na bhale apfe ya rue awulu oyoli.§

¹⁷ O ma ze mu ikpotso ni ẹ me ali eni e mholi eniye ni ẹ nye enyeli shi egbe egheghe agho.

¹⁸ Lema Eshinegba ọ khi bie ze ni o de shi egheghe ni ulili oniemi o la gbe egbo elemhi ukpe.

¹⁹ Itobọ khi onana o ya khi osoli ni o kholo ne nya rote egheghe ni Eshinegba ọ te ma agbo. Ogbọ a ke gbo ya me osoli uza onana ghue eke agbo.*

²⁰ Ini Eshinegba ọa li rote ogbele osoli ni a ngme ena khi-a, ogbokhoghuo ọa ya dobe ji ukhomhi ọ le. Ama irari oyi egbo eyoli ni ọ ze oda ke, ọ ro rote eni ogbele osoli ena khi-a.

²¹ Egheghe agho ini ogbokhoghuo ọ gueye, ‘Ghekhe, ghe Omiefuese!’ Okekha khi eri ọ ye, ‘Ghe ọli oobọ khe!’ Khi mie ọli suo.

† **13:13** Li ze iMat 10.22 ‡ **13:14** Li ze iDan 9.27; 11.31; 12.11

§ **13:16** Li ze iLuk 17.31 * **13:19** Li ze iDan 12.1; Iro 7.14

22 Itobọ khi iromhi emiepfuese ali emekeguele e ya lasele. E ya ke rieḷe ọḷeḷe ali ikanya ọnyaloa ọdọda rọ ke di egbo. Ni o khia khi ini ọa gue kia, e ga li ya di egbegbi eni Eshinegba ọ zẹ ọda ke.

23 Irarigho, a ga lolo kuegbe-a ke to ọloe eke. Mhi she gue emhi nya ye ẹ shi eke se neni oni egheghe o ya ramhi.

Inyenegbe bhale oyi Omi Ogbo

(iMat 24.29-31; iLuk 21.25-28)

24 “Ini egheghe osoli ona o ga dose se nya,
“Ovo o ya bishi alo-a,
uki ọa ke doḅe ge,†

25 Ikpeta e deno ukhuli kule,
ukhuli ali ekpabo
ni e la irarogbe ẹ mhesẹ
e ya ke nighise.‡

26 “Egheghe agho, egbo nya e ya me khi Omi Ogbo
o kia elemhi otughunu ẹ bhale, elemhi ekpabo ali
ufumhi ni o ge nyanyanya.§

27 Egheghe agho, o ya ghie igeni eyoli e te asha
kpa, ikhi ukpesẹ agbo nya, ti egbo eyoli ni o zẹ ọda
ke gbili.

Osesẹ oyi oni ọora okhua-eni

(iMat 24.32-35; iLuk 21.29-33)

28 “Bino abi okhua-eni o li ẹ te. O kha da kpesẹ
ukhuli, ni o rọ ke ta ebe ne, lesẹ khi okasẹ o keḷe ya
le.

29 A kha da gbo li ligho me khi eni emhi ena khi
a da me we ne, lesẹ khi egheghe o she ramhi.

† 13:24 Li zẹ Aza 13.10; Ezik 32.7; iJoẹ 2.10,31; 3.15; Iro 6.12

‡ 13:25 Li zẹ Aza 34.4; iJoẹ 2.10; Iro 6.13 § 13:26 Li zẹ iDan 7.13;
Iro 1.7

³⁰ Abi o li mhi li gue ọli ẹ yẹ ẹ khi, ẹgbọ eghuo ni e la agbọ memena ẹa ya ghu ne, ni eni emhi ena nya e rọ bhale ya tse.

³¹ Eke ali ukhuli e ya dose, ama ingmemhi eyemhe ẹa ya tigbe dose ghue.

*Ogbokhoghuo ọa lese oni ogbele weẹ oni egheghe
(iMat 24.36-44)*

³² “Ogbokhoghuo ọa lese oni ogbele wekhi oni egheghe. Ghe egbegbi igeni ena iloghie ali mhemhe Omi ọli, se ni Itamhe lolighuo.*

³³ A ri ukpeloe shi eke ke tokpe, itobọ khi waa lese egheghe ni ọ la ya bhale.

³⁴ Eri ona o li abi omose ni ọ vu asha obini odonue, ni ọ ri ighumha eyoli shi apfe e ri ukpeloe khu shi na lue. Ọ gueye ogbogbo akanya ni ọ ya gbe. Ọ gueye oni ọ khe ekhe ọ ke khe ekhe apfe.†

³⁵ “Irarigho, ke khe ekhe, itobọ khi waa lese egheghe ni oga ọ rọ ya jele. Ini elogbomhi lo o, okekhi itsotso ogbie lo o, okekhi egheghe obili-atso lo o, abi khi ogbie-fiefie lo.

³⁶ Ini ọ bhale guo, khi ze ni ọ bhale ya ẹ khi u wa lese a.

³⁷ Abi mhi li gue ọli yẹ ẹ ena mhi li gbo gueye ogbokpa. ‘A ke khe ekhe!’ ”

14

*Ugbamhi ni a gba khe iJesu
(iMat 26.1-5; iLuk 22.1-2; iJon 11.45-53)*

¹ O ke kpe ogbele eva le ni a rọ ya li ukpe iPasova ali ukpe ni a la le ibuledi ni aa ri ifuma

* **13:32** Li ze iMat 24.36 † **13:34** Li ze iLuk 12.36-38

shi nye, ighie eyi ekpodalo-ugamhi ali esese Ishi eyi iMosisi, ee nono ode ni e te ya bena mu iJesu gbe-a.*

² E egbe, “Awa khi riyele oli ini a li imu, onyaghu oya ya lasele shi o.”

*A la iBetani ku oili shi iJesu egbe
(iMat 26.6-13; iJon 12.1-8)*

³ Abi iJesu o ro la eoli iBetani, owa oyi iSamon efafe e kpe mu shito le eminale, okpotso oghuo o rue ukoko ituale ni o lolo ghale, ni o pfielasele. O gbe oni ukoko a, o ku oni ituale shi iJesu ukhomhi.†

⁴ Egbogbo eghuo ni e la agho, e ri elemhi ibibi lie egbe, “Elo o ze ni a ro na pfiueche oni ituale kua shi afue?”

⁵ A kha ri oli de ramhi ifata ukpe ali emhi, a kemhi eni ikpagho na eni ea mhue. E shi oni okpotso unu egbegbo.

⁶ Ama iJesu o o we, “A ze oli obo. Elo a yese oli e ngme shi? Egbegbi emini o ti ni o somhi otse o riyele na mhe.

⁷ Egheghe kpa eni ea mhue e ro nu e la ana, egheghe ni o ghole e kpa a kpaghie we obo. Ama aa ya me mhe egheghe kpa.‡

⁸ Emini o dobe ya riyele o riyele egho. Eri o ku ituale ku mhe egbe shi eke khe egheghe iroto oyemhe.

⁹ Igesikia mhi gue e ye e khi, ashashini a da la tse abo usomhi onete eke agbo ona nya ne, a ya yele emini okpotso ona o riyele le.”

* **14:1** Li ze Okiali 12.1-27 † **14:3** Li ze iLuk 7.37-38 ‡ **14:7** Li ze iDeut 15.11

*IJudasi ọ lama khi ọli ya ri iJesu de
(iMat 26.14-16; iLuk 22.3-6)*

¹⁰ Eghẹghẹ agho iJudasi Isikaroti, ni ọ khi ọtuoghwo eniye odukhokho ogbava, ọ le deba ighie eyi ekpodalo-ugamhi, ni ọ ya ri iJesu na we de.

¹¹ Onana ni ọ gueye we, o ga ghole we. E shobo khi wewe e ya ri ikpago na li. Igho iJudasi ọ li nono eghẹghẹ ni ọ ti ni ọ ro ya me asha ri iJesu na we.

*Ijesu ọ nu eniye odukhokho eyoli le Eminale
iPasova
(iMat 26.17-25; iLuk 22.7-14,21-23; iJon 13.21-30)*

¹² Ogbele ni odode ni a li oni ukpe ni a la le ibuledi ni aa ri ifuma shi nye o ramhi, ni o khi ogbele ni a ro gbe ozele Osumha oyi oni iPasova-a, eniye odukhokho eyi iJesu e mhila li “Ashi o ghole e ni anye mu egbe shi eke ne, ni u la le eminale iPasova?”

¹³ Igho, ọ ghie eniye odukhokho etuava eyoli, ọọ we, “A lo ifuapfe, omose ni ọ tsua ubene amẹ, ọ ya lona e ode. A deba li je apfe.

¹⁴ A gueye oni ọ mhọli apfe ni ọ ya lo, khi, ‘Osese ọọ, anye mhile u ri anye khasẹ elemhi owa ni ọli ali eniye odukhokho eyelue wewe e la ya le eminale iPasova?’

¹⁵ Ọ ya re e khasẹ agbala ni emhi nya e gba shi ukhomhi owa atonga, a muno egbe shi akago na awa.”

¹⁶ Eni eniye odukhokho e vu, e lo ifui apfe, e ya me eni emhi tee abi iJesu ọ gue ọli ye we. Igho e mu egbe oni eminale iPasova.

17 Ogbomhi o mu eke, iJesu ali eni eniye odukhokho ogbava e bhale.

18 Abi e li shito gase itebu le eminale, iJesu oḡ we, “Egbegbi-ingme mhi gue e ye e khi oṣuoghwo elemhi e o ya re mhe de. Oni o nu mhe le emhi memena.”§

19 Udu o yese we-a, oṣuoghwo-oḡhwo oḡ mhila li, “She khi oḡa khi mhemhe o khi?”

20 O so we o, oḡ we, “Oṣuoghwo elemhi eḡ ogbava o ya khi, oni o ga ri ibuledi nu mhe e somhi elemhi utasa memena.

21 Eri Omi Ogbḡ o ya ghu-a abi a li keke oḡi shi eke na li. Eri-tse khi, o maa kholo oni o ya roḡi de egbe! O kha ga ti ne, ini oḡbḡ oḡa bie bia li lo!”

Eminale oyi Onomhue

(iMat 26.26-30; iLuk 22.14-20; 1 iKori 11.23-25)

22 Abi e li le eminale egho, iJesu o rue ibuledi, o kphemhi, o khi oḡi a, o ro na eniye odukhokho eyoli, oḡ, “A mo le; Idiegbe oyemhe na.”

23 Igho o gbo so onyo shi uko, o kphemhi, o roḡi na we, wewe nya e ga te o da.

24 IJesu oḡ we, “Oḡia eyemhe na ni e migha shi ishiobḡ onogbḡ, ni a ku kua na ebubu eḡbḡ.*

25 Mhi gue igesikia ye e khi mhi aa ke gbo ya roḡe onyo upfonu ona da, se ni obini Eghiele oyi Eshinḡgba, ni mhi la da onyo onogbḡ.”

26 Abi e ro to uwolo se, e fiḡ lasele, e je Ute Eḡera olivu.

IJesu o guele shi eke khi iPita o ya kie luḡ

(iMat 26.31-35; iLuk 22.31-34; iJon 13.36-38)

§ 14:18 Li ze Iwolo 41.9 * 14:24 Li ze Okiali 24.8; iJere 31.31-34

27 IJesu ọọ wẹ, “Eẹ nya, a ya na kua, a zẹ mhemhẹ-ghuo obọ, irari khi a she keke ọli shi Ebe-no-pfuase khi.

“Mhi ya ri emhi li
 ọrisumhakia,
 isumha e ya vẹ kua.”†

28 “Ama ini a guise mhe le se, mhi ya ralo khe ẹ iGalili.”‡

29 IPita ọọ li, “Ini ẹgbọ nya e ririẹ kie ẹ, mhi aa ya kie ẹ.”

30 IJesu ọọ iPita, “Mhi gueye khi, neni ọkpa ọọ gbieghẹ iteva amiọse, u ya kie mhe itese.”

31 IPita ọ kie gema ọ gue gagaga, ọ liẹ, “Ini o ri riẹ khia khi oni mhi la nu ẹ ghu-a lo, mhi aa ya tigbe kie-ẹ.” Enekpole nya e li ngme ghọ.

*Ijesu ọ la iGẹtisemani sọ iromhi
 (iMat 26.36-46; iLuk 22.39-46)*

32 E je ashini a lu iGẹtisemani, iJesu ọọ eniye odukhokho eyọli, “A shitọ ana ni mhi ya sọ iromhi bhale.”

33 Ọ rue iPita ali iJoni ali iJemhisi ma egbe vu. Iyesudu-a ali anasemhe e bhale na li.

34 Ọ wẹ, “Oya ni o la mhe udu memena o gba a. O ga nono ni lue gbe mhe. A migha akana khe mhe, a ke tokpe.”

35 Ọ ti je odalo denẹ, ọ de ya yeshi eke, ọọ sọ iromhi ini o ya zẹ riẹle ni oni ẹghẹghẹ ona o dose lue.

36 Ọọ, “Itamhe, Itamhe, emhikpa o zẹ ẹ riẹle. Rue mhe oni uko osoli ona odalo le. Eri-tse khi, ọa khi abi o ghole mhe, seẹ ni abi o li ghole ẹ.”

† 14:27 Li zẹ iZaka 13.7 ‡ 14:28 Li zẹ iMat 28.16

37 Abi ọ nyenẹ egbe bhale, ọ mẹ khi eni eniyẹ odukhokho e lese-a. Ọọ iPita, “ISamọ, eri u lese-a? Aa dobe nu mhe tokpe ukuku eghẹghẹ tse?”

38 Ri ukpeloe shi eke gboo ke so iromhi ini u khi de ini u mholi imufe. Ayemhe oye o mu egbe ni o ro riye, eri-tse khi, idiegbe oye ọa dobe.”

39 Igho ọ gbo vu ya so iromhi enabi ọ kpe so.

40 Abi ọ ro nyenẹ egbe bhale, ọ gbo bhale ya ẹ we khi e lese-a, irari khi olese o la we alo, ẹa lese abi e ke ya ngme ọli.

41 Abi ọ ro nyenẹ egbe bhale utonuzese, ọọ we, “Olese a kie la, ni a yemhe-a? Olese ogho o she bu ẹ! Oni eghẹghẹ o she ramhi. A bino khe khi, a ri Omi Ogbọ na ena olamhe de.

42 A vule ni awa vu! Oni ọ remhe de ọọ bhale ena!”

A mu iJesu

(iMat 26.47-56; iLuk 22.47-53; iJon 18.3-12)

43 Abi ọ li ngme, iJudasi, ni ọ khi ọtuoghwo elemhi eni eniyẹ odukhokho ogbava ọ bhale. Egbọ ni e tsua itsua okholi ali itakobi ali ikpokpo, ni ighie eyi ekpodalo-ugamhi, ali esese Ishi eyi iMosisi ali egbhali e ghie, e nu ọli bhale.

44 Oni ọ roli de ọ she kpe gweye eni e nu ọli kia, ọọ we, “Oni mhi da pfipfi ekphamhi ne, lolu ọ khi oni a nono. A mu ọli, a khe ọli ekhe rue vu.”

45 Abi e ro lese lole, iJudasi ọ le deba iJesu, ọọ, “Osesẹ.” Ọ pfipfi ọli ekphamhi.

46 Eni emose e mu iJesu.

47 Igho ọtuoghwo eni e migha epfe-aghọ ọ ji itakobi oyoli emhi lasele, ọ be oghumha ọyi Ọga ọyi ekpodalo ugamhi esọ-a.

⁴⁸ IJesu ọ́ọ́ wẹ, “Okhọli mhi tsua, ni a rọ lina tsua itsua okhọli ali itakobi ali ikpokpo bhale ya mu mhe?

⁴⁹ Ogbele kpa mhi rọ nu ẹ la, mhi la Owa oyi Eshinegba ẹ sese. Aa mu mhe. Eri a me emhi ena ni emini a keke shi Ebe-no-pfuase o bhale ya tse.”§

⁵⁰ Igho eniye odukhokho eyoli nya ni e deba li e ve kua, o kpe lolighuo le.

⁵¹ Ozeo oghuo ni o so awulu ona yeyeye, oo deba iJesu. Abi e rọ to obo so li, khi wewe e ya mu oli,

⁵² o nyanọ awulu-a mhuẹ wẹ abo, o ri irumheba na vu.

Otu iSaediri e ri iJesu gue ezọ

(iMat 26.57-68; iLuk 22.54-55,63-71; iJon 18.13-14,19-24)

⁵³ E mu iJesu bhale owa oyi Oga oyi ekpodalo ugamhi, ighie eyi ekpodalo-ugamhi nya, ali egbhali ali ekekebe ali esese Ishi eyi iMosisi nya e le gba.

⁵⁴ IPita o tapfia deba li ukhu-khokho, ya ramhi elemhi apfe oyi Oga oyi ekpodalo ugamhi. O nu eni ẹ khe ekhe shito khasẹ erali.

⁵⁵ Eni ighie eyi ekpodalo-ugamhi ali oni igbaa oyi iSaediri nya, e nono emhi ushi ni e ya mu mhọli iJesu obo, ni e ba me asha gbe oli-a. E a me emhikhoghuo.

⁵⁶ Ebubu egbo e pfi otsese eyi egbhọli mu oli, eni otsese nya, ẹa de shi oghuo.

⁵⁷ Ikpukhokho, egbo eghuo e vule pfi otsese egbhọli ona mu iJesu. Eẹ,

§ 14:49 Li ze iLuk 19.47; 21.37

58 “Anye suọ khi ọọ liẹ khi, ‘Mhi ya guọghọ Owa oyi Ẹshinẹgba onana ni ẹgbọ e ri abọ ma-a, ẹlẹ-ese mhi tọ olese ni ẹgbọ ẹa ri abọ ma.’ ”*

59 Abi e riẹ kie ngme ona, ọtsẹlẹ eyewẹ ẹa kie de shi oghuo.

60 Ighọ Ọga oyi ekpodalo ugamhi ọ vule migha odalo oyewẹ nya, ọ mhila iJesu. “Waa bie ya sọ wẹ ọ? Ẹzọ elọ na ni ẹgbọ ena ẹẹ gue shi ẹ egbe?”

61 Ama iJesu ọ tsaghie a, ọa sọ wẹ ọ. Ọga oyi ekpodalo ugamhi, ọ gbo mhila li, “Yeyẹ u khi Ọmiepfuese, Omi Ẹshinẹgba ọna Kueghie?”

62 IJesu ọọ li, “Lọli mhi khi. Ẹẹ nya a ya mẹ khi Omi Ọgbọ ọ shitọ obita oyi Ẹshinẹgba ni ọ funẹ, ali khi ọ la utughunu rọte irarogbe ẹ tiemhie.”†

63 Ọga oyi ekpodalo ugamhi ọ nyanọ itsua shi egbọli uruli abi ọ li yila. Ọọ, “Awa ke gbo nono ọtsẹlẹ olese.

64 Ẹẹ nya a she suọ abi ọ pfi unu-a deba Ẹshinẹgba. Sẹ a sọ shi ọ?”

Wewẹ nya e pfa ezọ mu ọli khi ọni a gbe-a ọ khi.‡

65 Ẹgbọ eghuo ọ, e tonon etẹ ku ọli. E ri emhi gẹnọ ọli alo. E pfi ọli emhi, ẹ ọli, “Mẹ ekẹ guele, gueyẹ anye ọni ọ pfi ẹ emhi?” Eni ẹ khẹ ekhẹ e mu ọli, e lase ọli esọ.

IPita ọ khi lẹli ẹa lesẹ iJesu

(iMat 26.69-75; iLuk 22.56-62; iJón 18.15-18,25-27)

66 Abi iPita ọ kie shitọ elemhi apfẹ egbo, ọmueshi ọghuo ni ọ khi ọni ọọ ga oyi Ọga oyi ekpodalo ugamhi ọ bhale.

* 14:58 Li zẹ iJón.2.19 † 14:62 Li zẹ iDan 7.13 ‡ 14:64 Li zẹ iLev 24.16

⁶⁷ Ọ me iPita abi ọ rokhase erali, ọ toli okpe tsuke. Ọọ li, “Yeye u li nu iJesu na iNazareti i kia.”

⁶⁸ Ama iPita ọ tia. Ọọ, “Mhi a lese emini wa ngme.” Ọ lase agho le je ode ni a te ẹ lo elemhi apfe. [Igho okpa ọ gbieghe.]

⁶⁹ Abi oni omueshi ni ọ ga ogbo ogho ọ ro gbo me iPita agho, ọ gbo riefe eni ingmemhi ngme khase eni e migha epfe agho. Ọọ, “Otuoghwo elemhi we, oni omose ona ọ khi.”

⁷⁰ IPita ọ gbo tia.

Oo li denfe, eni e migha epfe agho e ke iPita, “Igesikia lo khi otuoghwo elemhi we u khi, irari khi onge iGalili u khi.”

⁷¹ Igho ọ li se egboli isheli, ọ romhi eni isheli. Ọ lie, “Mhi aa ga lese omose ona ni a ngme ena.”

⁷² Utoghwoke, okpa ọ gbieghe utonuzi-eva. IPita ọ sato emini iJesu ọ gueye oli khi, “Neni okpa ọ ya gbieghe utonuzi-eva, u ya kie mhe itese.” Igho ọ gbe akhe evie a.

15

A rue iJesu bhale odalo oyi iPaleti

(iMat 27.1-2,11-14; iLuk 23.1-5; iJon 18.28-38)

¹ Eluzogbe fiefe, ighie eyi ekpodalo-ugamhi, ali egbhali ali esese Ishi eyi iMosisi ali igbaa eyi iSaediri nya, e ye ugbamhi. E ge iJesu rue vu ghi iPaleti.

² Oni iPaleti ọ mhila iJesu ogbo, ọọ li, “Oghie oyi egbo iJu u khi?”

Ijesu ọọ, “Eee! Igho lo abi u ngme oli.”

³ Eni ighie eyi ekpodalo-ugamhi eyi Eshinegba e ga gue ezọ emhi ebubu shi iJesu egbe.

4 Igho iPaleti o gbo mhila li ogbo, oṣo, “Wa ya pfunu, u suo iwali ezo ni e gue e shi e egbe?”

5 Ama iJesu oṣo li o. O ri abo sha iPaleti.

A pfa ezo mu iJesu a ka gbe oṣo a

(iMat 27.15-26; iLuk 23.13-25; iJon 18.39–19.16)

6 Abi aa li ini o lina ramhi eghẹghẹ ukpe iPasova, eri iPaleti o rue ogbo oghuo owa ighumha lasele na we abi o ghole we shi.

7 Eghẹghẹ agho omose oghuo ni a lu iBarabasi o la owa ighumha, ni o khi oghuo egbo ni a mu. Eri a mu oṣo shi ugbeli ni o gbe eghẹghẹ ni a ro me onyaghu.

8 Abi eni egbo e ro bhale gbii ya mhila iPaleti o ri ele emini o kie kpe ri ele na we,

9 iPaleti o mhila we, oṣo, “A nono ni mhi rue oghie iju abo a na e?”

10 O ga lese gboo khi itobo ibiselemhi, ighie eyi ekpodalo-ugamhi e ro mu iJesu ghi lue.

11 Ama ighie eyi ekpodalo-ugamhi e sese egbo e gueye iPaleti o ri ochoghwo wolo iBarabasi obo a na ewe.

12 iPaleti o mhila we, oṣo, “Elo mhi ke li oni a lu oghie iju sho?”

13 E sese leghe, “A ta li ma oara apfida.”

14 iPaleti o mhila we, oṣo, “Elo o ze, umha-guekia onoghwo o ri ele?” Ama eena e sese ne, “A ta li ma oara apfida!”

15 Ni o ro ri ele emini oo ghole eni egbo, o wolo iBarabasi abo-a na we. Oṣo e gbe iJesu ite, o rue oṣo na we e ka ta li ma oara apfida.

Ekholi-okhue e ri iJesu li egia

(iMat 27.27-31; iJon 19.2-3)

16 Eni ekhòli-okhue e rue iJesu lo elemhi apfe agbala oyi igovunò. E lu ekhòli-okhue apfewe eni e kpòle.

17 E ri awulu ichè ni o khi egholi ibulu, sò li, e ri igba do arula rughu òli ukhomhi.

18 E liè òli, “A da abò na oghie oyi egbò iJu!”

19 E pfinò òli ukpokpo ukhomhi iti ingmi-ingme, e tono etè ku òli. E de ya wugha li odalo, e nyese ukhomhi na li.

20 Abi e rò lighò ri iJesu li egia se nya, e gueghie òli oni awulu ichè ni o khi egholi ibulu oghò, e nyenè egbe ri itsua eyòli sò li. Ighò e rue òli vu ya tama òara apfida.

A ta iJesu ma apfida

(iMat 27.32-44; iLuk 23.26-43; iJon 19.17-27)

21 Abi e rò lè, e ya è omòse oghuo ni a lu iSamò ni ò ròte odè oyòli dọsè, ni ò ròte asha jele. Ighò eni ekhòli-okhue e ri itoto mu òli ò tsua òara apfida oyi iJesu. ISamò ọngi iZirèni ò khi, ò gbo khi ita Alèzada ali iRufòsi.*

22 E rue iJesu bhale ashini a lu iGògòta. [Ugua ukhomhi olimhi a ri iGògòta ngme]

23 A ri onyò ni a ku ikhumhi na lui Imari shi na li ò rò da, ama òa lama da li.

24 E ta li ma òara apfida. E kemhi itsua ni ò sò mhòli egbe abò. E ti ebe rò kemhi eni ide eyòli, ni e lèşè oni o ya tẹ ọgbọgbọ.†

25 Eghèghè agogo itili eluzogbe a rò ta li ma òara apfida.

26 Emini e kẹkẹ rò kphase oni òara apfida kpeda na li khi. Oghie Oyi Egbò iJu.

* 15:21 Li zè iRom 16.13 † 15:24 Li zè Iwolo 22.18

27 E li gbo ta ighiatọ etuava ma ọara apfida mama li, ọtuoghwo ọ la li obọ-ita, ọnọkpọle ọ la li obogobo.

28 Ona o ri emini a kẹkẹ shi Ebe-no-pfuase bhale ya tse, ni ọ́, “A leli ọli ma ighiatọ.”‡

29 Egbọ eni e te epfe aghọ dọse, e pfi itsue manya iJesu, ee nighise ukhomhi, e lie, “Ebanẹkẹ! Yeye ni u ya guoghọ Owa oyi Eshinegba-a, u gbo riele ọ to ogbele ese. §

30 Rọ te ọara apfida tiemhie shọ ya mie egbe ẹ pfuese.”

31 Ighọ ighie eyi ekpodalo-ugamhi, ali esese Ishi eyi iMosisi e li ri iJesu li egia, e lie egbe we. “Ọ mie egboese pfuese, ama ọa dobe mie egbọli pfuese.

32 A ze ni oni Omiepfuese ọna, ikhi oghie iZireni, ni ọ rọte ọara apfida tiemhie ni awa me, ni awa mie ọli suo.” Eni a li ta ma ọara apfida mama li, e ga li nu we tsue ọli.

Eghuli oyi Jesu

(iMat 27.45-56; iLuk 23.44-49; iJon 19.28-30)

33 Agogo igbeva oguota, obili o bi oni eke a nya. Elemhi iwakati ese oni obili o la ogbe ramhi.

34 Agogo ese o ramhi, iJesu ọ tseşe leghe, ọ ri unu ọli oyewe lie, “Eloi, Eloi, Lama Sabachi tani?” Em-ini a ri ona ngme khi, “Eshinegba oyemhe, Eshinegba oyemhe, elo o ze ni u rọ tsua mhe pfi.”*

35 Abi egbo eghuo ni e migha epfe aghọ e rọ suo khi ọ ngme na, e ke, “Ri esọ shi eke khi ọ lui Elaja.”

36 Omose oghuo elemhi eni egbo ọ na ya rue isoso sọ li onyo ni okhe a, ọ ge ọli shi ukpokpo roli kpe

‡ 15:28 Li ze Aza 53.12 § 15:29 Li ze Iwolo 22.7; 109.25; iMak 14.58; iJon 2.19 * 15:34 Li ze Iwolo 22.1

iJesu unu ọ rọ da. Oni ọmọse ọ ke. “A ze ọli obo, ni awa me ini Elaja ọ ya bhale ya rue ọli ukhomhi ọara apfida tiemhie.”†

37 IJesu ọ tseṣe leghe, ọ ghua.

38 Ukpokpomhi ode ugbakpi ni a rọ pfa ode-a shi elemhi Owa Oyi Eshinegba, o rọte idane kiṣeṣe-a asha eva ya to eke.‡

39 Abi ọkhọli-okhue ọniemhi ni ọ migha odalo oni ọara apfida ọ rọ suọ abi iJesu ọ tseṣe leghe, ni ọ rọ me abi ọ li ghua, ọọ, “Egbegbo lo khi, Omi Eshinegba ọmọse ọna ọ khi.”

40 Ikpotoso eghuo e ta pfa bino, iMeli ọnge iMagidalen, ali iMeli inyi iJemhisi ọni ọ kpọke, ni ọ gbo khi inyi iJosisi ali iSalome.

41 Ikpotoso ena e mema deba iJesu ni e ri ukpeloe khu ọli obini iGalili. Ikpotoso elese ni e deba iJesu bhale iJerusalemu e li ga migha agho.§

Irotọ oyi iJesu

(iMat 27.57-61; iLuk 23.50-56; iJọn 19.38-42)

42 Ogbomhi o she mu eke eṣeṣe ni o khi eṣe ni a rọ mu egbe khe eṣe iyemhea oyi eṣe iJu.

43 IJosefu ọnge Arimatia, ni ọ khi ọghuo eni e mheṣe, ni ọ khi ọgbọ ni ọ li mu eṣe. Eri ọ bie kpẹ ri eṣe shi eke khe Eghiele oyi Eshinegba. Ọ gbe udu le ya gueye iPaleti o rue olimhi oyi iJesu na luẹ ya tọ.

44 O ga sha iPaleti abọ khi iJesu ọ she gbhe gho keṣe ghua. Ọ lui ọni ọkhọli-okhue ọniemhi ọgho mhila ini iJesu ọ she gbhe ghua.

† 15:36 Li ze *Iwolo* 69.21 ‡ 15:38 Li ze *Okiali* 26.31-33 § 15:41 Li ze *iLuk* 8.2-3

⁴⁵ Abi iPaleti o ro rote unu oyi oni okhōli-okhue oniemhi ogho suo khi igho o khi egbegbo, o tsua olimhi oyi iJesu na iJosefu.

⁴⁶ Igho iJosefu o de ide, o rue oni olimhi tiemhile oara, o khuli oli, o ri oli to uji ni a to shi eche. O gheghele eche oniemhi guese oni uji.

⁴⁷ IMeli onge iMagidalen, ali iMeli inyo iJosisi e me ashini a ri oli to.

16

Irote eghuli guale oyi iJesu

(iMat 28.1-8; iLuk 24.1-12; iJon 20.1-10)

¹ Abi ele iyemhea o ro dose se, iMeli onge iMagidalen, ali iSalome, ali iMeli inyi iJemhisi, e de afu ituale ni epe pfiemhue obo ni wewe e ya khakha li shi idiegbe olimhi oyi iJesu.

² Ogbie-fiefie ni o khi uka, khi ovo o lese ngale, e je atalimhi ni a roli to.

³ Igho e mhila egbe we, "Oghuo o ya gheghele eche unu oni atalimhi-a na awa?"

⁴ Ama abi e ke ro yase alo eke bino, e me khi a she gheghele oni eche ni o gho gbedi unu oni atalimhi-a a.

⁵ Abi e ro lo oni uji, e me ozeo ni o so itsua epfopfo na dogo, khi o shito epfe obita. O sha we abo.

⁶ O o we, "Abo e khi sha e." "iJesu onge iNazareti oni a ta ma oara apfida a nono? O she te eghuli guale. Oa la akana. Ghe ashini a roli to.

⁷ Ama a ke vu, a ka gueye eniye odukhokho eyoli ali iPita khi, 'O she ralo iGalili e khe e. A ya bhale ya e oli shi agho abi o kie kpe gueye e.' "*"

* **16:7** Li ze iMat 26.32; iMak 14.28

⁸ Eni ikpotso e lasele, e na ya je apfe. Abo e sha we, ulishi oo mu we, ẹa nu ogbokhoghuo ngme irari khi ulishi ó mu we.

[Ebe eni odode eghuo eni a rote keke oni Usomhi Onete ona, ẹa mhọli odada 9-20 oyi ukhomhi 16 ona.]

*Ijesu o ri egbọli khasẹ iMeli ọngi iMagidaleni
(iMat 28.9-10; iJon 20.11-18)*

⁹ Abi ijesu o ro rote eghuli guale ẹle uka se, o ri egbe ọli kpẹ khasẹ iMeli ọnge iMagidaleni, ọni ijesu o khu ayemhe ebe ishilua rote egbe ya fiẹ.

¹⁰ O vu ya gueye apfe ijesu ni ee vie.

¹¹ Abi e ro suo khi ijesu o she guale khi o la agbo ali khi iMeli ọngi iMagidaleni o me ọli, ẹa mie shi ọli o.

*Ijesu o ri egbọli khasẹ eniye odukhokho aava
(iLuk 24.13-35)*

¹² Abi a ro me ona se, ijesu o rote ode ododa ri egbọli khasẹ ewe aava abi e li lo elemhi oni ẹoli.

¹³ E nyene egbe jele, e gbo gueye eniye odukhokho ni e kpole, ama, ẹa gbo li mie shi we o.

*Ijesu o ri egbọli khasẹ eni eniye odukhokho og-
baghuo
(iMat 28.16-20; iLuk 24.36-49; iJon 20.19-23; Ika
1.6-8)*

¹⁴ Ikpukhokho, ijesu o ri egbọli khasẹ eni eniye odukhokho ogbaghuo abi e ro le eminale. O dese we shi umha-mhọli irudunga oyewe, ali umha-nono ni e mie shi emini eni e me lue e ngme abi o ro guale se.

¹⁵ Ọọ wẹ, “A lo elemhi eke agbo nya, a ke gue usomhi onete oyemhe ye ogbokpa.†

¹⁶ Ọnini ọ da mie ẹ suọ, ni a da batazi ne, ọ ya mholi imiepfuese, ama ọni ọa da miesuọ, a she pfa ẹzo mu ọli.

¹⁷ Ọlele ona o ya ke deba eni e miesuọ, e ya ri eva oyemhe khu ayemhe ebe kua, e ya ngme emue onogbo unu.

¹⁸ E ya ri abo eyewe mu enye eke, ini e rie rue ikhumhi ni ọọ gbe ogbo da, ọa ya li we abikhoghuo. E kha ri abo nga eni ẹ ghua egbe, e ya toto.”

A rue iJesu nga obini iloghie

(iLuk 24.50-53; Ika 1.9-11)

¹⁹ Abi iJesu Ọnọmhue ọ rọ nu wẹ ngme se, a rue ọli nga idane iloghie. Ọ shito ukiẹkiẹ obita oyi Ẹshinegba.‡

²⁰ Igho eniye odukhokho eyi iJesu e li fiẹ ya tse abo oni usomhi onete gase asha kpa. Igho Ọnọmhue ọ re wẹ gbe ikanya, ọ ri ikanya ọnyalao ni e gbe ri ungmehi oyoli tse.

† 16:15 Li ze Ika 1.8 ‡ 16:19 Li ze Ika 1.9-11

Ebe-No-Pfuasę Ishobo Onogbo
New Testament in Ivbie North-Okpela-Arhe
(NI:atg:Ivbie North-Okpela-Arhe)

copyright © 2012 Wycliffe Bible Translators, Inc.

Language: Ivbie North-Okpela-Arhe

Translation by: Wycliffe Bible Translators, Inc.

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9789789194797

The New Testament

in Ivbie North-Okpela-Arhe

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 18 Apr 2025 from source files
dated 29 Jan 2022

03be06b0-68fd-500b-b9a9-6bca4b63979a